

蒲州府志

第九冊

193
532P87
1755
V.9



冊 9
卷 21-22

蒲州府志卷之二十一

藝文

國朝魏象樞浙江按察副使復庵衛公墓表

平陽蒲坂之間土風敦樸自昔多賢人君子至薛文清公倡明絕學爲世儒宗其流風遺範被乎鄉國其所成就人才尤卓犖蓋中世之爲儒者往往滋辨論立門庭其流不能無弊文清之學主於躬修實踐深造默成爲其學者惴惴無華而其究能有以自立若吾友復庵衛公其選也公諱紹芳猗氏人順治乙酉

舉於鄉丙戌成進士知尉氏縣擢兵部武庫司主事
再遷爲督捕郎中出補福建漳南道歷四川川北道
貴州提學道浙江巡海道致仕家居十餘年卒公之
先多宿儒世以易學顯公少孤貧力學得文清公讀
書錄讀之慨然有慕乎其人潛心理學標錄儒先之
言凡案牆壁皆滿自爲諸生矩步繩趨痛自砥礪比
居官益清謹勤於其職其令尉氏也招徠流亡芟除
強梗民氣漸甦則爲之修舉學校完城郭新廨署百
廢具舉尉人尸而祝之其備兵漳南也戮營卒之通

賊者而賊以衆降築隄注水困賊而深籌積年之寇
悉就縛其在蜀也勦平川南劇賊單騎撫其餘黨在
黔也能以正學董勸師儒士知向風此皆政績卓卓
可稱道者而要於寬厚廉平實心任事不爲赫赫名
而職業無所不盡以母老致其事歸中途而母夫人
病卒二千里徒跣扶柩北歸盛寒露宿柩下手足凍
皴未嘗居旅舍其天性篤摯如此家居以維持風教
爲已任居喪一用古禮建宗祠修族譜釐正葬祭儀
節著小學家訓等書凡若干卷於易學尤邃也冢子

既齊有學行能世其家初爲翰林檢討公命之曰勉
樹名節上報國恩及出判霸州又命之曰官無尊
卑內外隨分盡職皆足自見既齊謹受命賢名日益
聞公之教也余與公爲同年友始識公於京師表裏
粹然篤厚長者也去而爲吏治行發聞知其勇於自
樹也已而其子來官京師始得聞其闇修篤學之詳
嗟乎生大賢之鄉聞風而興起者有矣修之於家見
之於政事光明俊偉者亦無幾人如公可不謂賢哉
至行過人而不自表襮著書滿篋而不名一家余懼

其久而無傳也因其子之請裒其大端揭而書之

其人而無辭也因其子之請泉其大澤

國朝蔣超遊萬固寺記

寺在中條之麓距州城十五里河中佳勝處也出郭
東南行數里已聞水聲益前二三里涉溪溪琮琤韻
響如瑟如筑行漸近見寺在巖戶間歷磴道上遂入
寺寺因山爲高崇構數層有佛像居中甚壯長可四
五丈及升樓俯視則人足適臨佛顛又升復有屋視
樓倍高後更平坦浮屠築焉爲多寶之塔至此縱眺
則百里皆見白者如帶翠者如掌黃河華岳如几席
間物亦登臨之快觀矣寺建於隋時至唐尤盛宋程

明道元王惲皆常遊焉亦皆有詩惜其刻石久毀而不存而陷壁者詩版尚多亦少可讀也寺外平田開曠多柿林幾數千本方秋深時霜葉染紅望之蒸蒸如霞燒火烈景爲最奇蓋蒲人以種柿爲利也自始登山日甚早午飯寺中復延緣久之比還日已夕旣樂斯遊之適紀以二詩以志歲月云

國朝王士禎吳徵君墓志銘

漢魏已來二千餘年間以詩名其家者衆矣顧所號爲仙才者唯曹子建李太白蘇子瞻三人而已本朝大一統閱六十載作者亦多矣余獨以仙才許蒲阪吳君此余之私言也亦天下之公言也君且死語弟霞曰吾平生知己無逾漁洋先生吾卽死遺詩勿遽出必待先生刪定雖相望二千里爾勿憚跋涉而往求焉且謁誌墓之文吾無憾矣余居田里聞君之訃爲哀輓以代楚些其末云已空文字障靜閱莊嚴

刼何事勞結集猶煩大迦葉未幾而霞至將君遺命
余詩若爲之識然嗚呼異哉豈余與君精神感通雖
越在二千里不以幽明相問有如此耶既次其詩遂
爲其銘君諱雯字天章其先遼陽人也父允升中順
治二年順天鄉試六年授蒲州學正十二年賜同進
士出身明年卒卒後次年吏部按籍銓授知臨潁縣
君幼母朱氏有節操撫君及弟霞等皆成立遂家於
蒲君姿秉殊絕嗜書如飲食又薄帖括以爲不足爲
雖在諸生輒瀏覽羣籍自六經三史外先秦兩漢下

逮六朝唐宋元明四部之書無弗習也旁及釋老內
典秘笈皆鈎貫其旨趨含咀其英華而尤於五際六
義有深嗜焉初僑居中條山南之永樂永樂唐縣也
李石兄弟三相皆居之詩人李商隱義山亦居之號
玉溪生玉溪者永樂水名也君少而食貧無以爲養
數游京師謁父執友年二十餘矣京師士大夫無知
其詩者予一日過同年榮工部洞門見其詩云泉遶
漢祠外雪明秦樹根又云濃雲濕西嶺春泥霑條桑
至今堯峰上猶上堯時日大異之曰此非今人之詩

也吟諷不絕於口久之君再入京師一見談藝輒夜
分不休如釋迦之有鶯子瀉山之有寂子相悅以解
不待往復扣擊君固以謂余一人知己如后山之于
南豐也戊午己未間 天子詔徵博學宏詞之儒

備顧問特舉制科海內名士鱗集闕下君在舉中顧
獨耽寂守素不與他人走健僕囊巨軸宛顏低眉望
門求知者競馳逐膠牢澹泊門有雀羅余以是益重
之臨朐馮相國知君名以扇索其詩君大書二絕句
答之其坦率如是卒以不遇亦不悔也君游燕趙齊

魯吳越秦楚足跡半天下而梁宋間詩尤工晚訪舊
天津復與余相見京師時康熙辛巳君年將六十倦
游矣君好友天下士士之名雅者亦皆援君自重所
至縞紵贈答無虛日然君胸中涇渭不徇世俗毀譽
涼燠以爲親疎故人亦樂就之所謂嵇叔夜土木形
骸黃叔度汪汪如千頃波者度幾似之平生好仙釋
有空諸所有仰青雲睹白日之意情耽隱逸僕僕四
方謀升斗以爲甘旨之奉非其志也嘗買圃鄭谷之
口有竹數百挺黃梅數十株橘三株中作草堂面雷

首肘太華怡然自足將以終老而迄不得遂嗚呼其可悲也君詩一刻於吳中再刻於都下三刻於津門今未刻尚千餘篇余刪之不少貸所存皆卓然可傳蓋痛君彌留不忘誣諉之意亦以報良友於地下云爾今當宁右文士苟懷一藝朝躡芒屨而夕登館閣者何限君之名固已聞於朝矣而終不遇窮老以死是尤可悲也君娶祁氏孫一逢源尚幼君卒以康熙四十五年九月十一日葬姚溫阡君嘗以詩賦應制科故稱徵君銘曰

山河兩戒皆首河中重華舊都扶輿所鍾昔在唐賢
摩詰允言義山玉溪表聖王官有明名世首兩襄毅
勲名爛然風騷未繼嶽嶽吳生崛起布衣身處菰蘆
名動京師聲滿天下尚謀升斗晚卜菟裘子真谷口
唯君之詩疏越朱絃後有知者移情成連神之往來
河聲嶽色修竹梅花徵君攸宅

蒲州府志

卷之二十一

八

國朝衛旣齊郭烈婦傳

烈婦荆氏者猗氏縣興教坊儒童郭琛妻也祖曰憲副公世爵父曰邑增生文邵母陳爲臨湘令陳公登度女烈婦生三歲而祖卒六歲而父卒母孀無丈夫子女二烈婦其長也字於郭未及笄而姑卒旣適琛值家中落烈婦勤操作茹蔬糲不厭琛善病烈婦朝夕侍湯藥經年無倦色琛疾少間產一子不育已而琛病復作勢且不起顧謂烈婦曰汝年少無子終節非易事也善自爲計烈婦奮然曰吾家世詩禮母氏

青年守志豈容有再醮女乎即君不幸誓一死相從
地下耳遂歸訣其母曰母十餘年茹辛撫孤女今不
得終事母矣母壯之曰能如是乎真吾女哉烈婦乃
盡出其衣飾爲琛償宿貸又分餘物遺夫之女兄弟
視琛疾革遂以醋和毒藥飲之昏仆地家人急救良
久復蘇琛既瞑烈婦撫尸慟絕者數四悒憤中猶作
進奉湯藥語及夕氣乃絕斂之日神色如生年蓋一
十八歲云

國朝瞿亮邦萬泉縣祀八蜡文

維年月日具官某謹以牲酒束帛祭於八蜡之神而敬告曰邦聞之伊祁氏始作八蜡歲十二月聚萬物而祭之取諸崇德報功八蜡之中有貓虎焉所以食田鼠田豕而先儒又謂有昆蟲之祀大抵舉貓虎而凡虫之害苗者皆鼠豕類也貓虎任之有餘矣今者麥比不登穡事孔亟蚡蚘爲害浮於禽饗邦將倣古之黃冠而草服葛帶而榛杖置鹿與女俟歲終一舉蜡則時非索報又蟲菑爲厲民患甚殷爰敢奉嘉旨

馨香薦諸先嗇請迎貓虎以食此害苗之虫母俾聚
族長爲蠹困乏之民庶猶有瘳乎

國朝范韓度萬泉令瞿公政跡記

邑令之賢民所愛也而賢之出類尤所愛令政之善
民樂傳也而善之異常尤樂傳故在昔蝗不入境虎
北渡河雨隨車麥兩岐千百年來頌歌傳贊依依口
頰間吾邑賢令代不乏人而五奇之政僅美新城嗣
厥徽者惟我公爲最公慈惠精明鞠育噢咻十有餘
載而異政之最著者旱魃爲虐二麥已稿秋禾無望
民慮再生之難公令設製五龍祭禱應期龍見靈雨
霑足歲仍有秋又螟螣害稼遍野蠶食莫可如何公

躬詣八蜡壇祭之虫悉團化溝塗間有狼食民薛生
芬幼子愬於公衆嗤其愚公拂然曰若野獸敢傷我
民命乎爲文牒之城隍狼遂自投堂下隱若被桎梏
者左右杖斃以償薛子命他如歲值大有黍與稷翼
所在皆然而一莖雙穗吾邑獨呈其瑞比類而觀又
何讓蝗南飛虎北渡諸異政哉夫災祥固所時有而
化災爲祥實非易易公之感神明格異物捷於影響
若是皆公之德爲之也民感其德旣銘之心頌之口
尤欲載之典章以永其傳爰合辭請誌與前人之記

新城者後先頡頏焉公虞山人名亮邦敬六其字也

國朝項樟始至永樂署記

余由黃岡量移蒲丞道出豫州越幽燕凡四千里達太原由太原至蒲州又千里丞署建州之東南永樂鎮土壁峭立取徑幽邃往往晝晦偏仄處不能旋馬又輿折百二十里而始至焉鎮多山民俗儉樸常自足無所仰於四方市鮮百貨出入田不產稻無魚蝦蟹蛤水族之利署據平岡僅二十楹皆土質瓦覆無丹雘丞貳於守不得侵有司吏人稀少偶至輒散去時維涼秋風摧木脫雖居公廨如在蕭疎村落之間

噫嘻余嘗兩仕蜀一仕楚矣均當水陸之衝過使紛
雜民好鬪健訟日治廳事夜省文書常若不及一遇
大官經臨飭供億肅奉迎陸走蠶叢水乘小舟下浩
瀚悍怒不測之江惟恐後期往往觸急風暴雨百出
傾危其勞且險也如此今則去危就安但坐鎮而無
餘事因得縱其耳目以窮異觀東望中條西窺太華
南俯黃河北枕玉簪峩眉西爲首陽其高風勁節猶
曠然動我遐思若夫烟斂晴暉羣峯競翠暮林秋月
倒影波光莫不爭效左右出奇無窮追思曩時風塵

奔走雖經巴蜀瞿塘三峽之奇黃州赤壁竹樓之勝
而心爲事役視若無覩豈能如今日之俯仰寬如胸
無凝滯也哉夫熱仕宦者乏登臨之趣樂林泉者鮮
組綬之榮是二者不得兼也而今兼之況乎茶筍蔬
果之屬時給於供釀柿爲酒絕佳取值廉與閒散吏
適宜傾壺偶酌心適味甜萬象洞如樂不可極昔歐
陽公在夷陵謂凡爲吏者莫不始至而不樂既至而
後喜也余於斯地亦云或曰河東俗強勁往年以抗
官釀大獄涖斯土者未易蔑視也余曰不然事變之

起挑激有由况百里風氣不同安可概吾民方今時
和年豐盜賊屏息余惟奉朝廷德意日與父老子弟
講讓型仁以激發其天良而秀者萃之於學澤以詩
書數年之間優游涵煦庶幾風希讓畔治跂文明余
於斯時其樂益進因志之以告後之君子按山川而
考風俗共大其休美焉

國朝郭爲觀涑水故道考

按桑欽水經云涑水出河東聞喜縣東山黍葭谷又西過周陽邑南又西南過其縣南又西南過安邑縣西又南過解縣東又西南注於張揚池酈道元注云涑水所出俗謂之華谷至周陽與洮水合涑水又西逕仲邨鄔北又西逕桐鄉城北又西逕王官城北又西南過安邑縣西以上皆今夏縣境蓋古安邑卽今夏縣禹王城故址漢晉以來無夏縣之名至隋始分置夏縣而移安邑於今治不然則注謂過安邑西者

將直入鹽池乎涑水又西逕監鹽縣故城城南有鹽池水此則今安邑境而鹽池水卽今北引之姚暹渠水也涑水又西逕猗氏縣故城北又西逕郇城此則今猗氏境蓋涑水自安邑北相鎮之西入邑境鳴條岡至此而伏故涑水自李漢郭村之間折而南順治中郭村人嘗掘地見大石橋懼不敢發蓋其故道也又折而東南經張河孫塢等村其地今猶謂之張河灘又折而西南歷楚侯王鑑張嵩諸村故跡宛然俗稱管溝卽注所謂逕猗氏故城北者也又西南經太

侯上庄及解之南扶等村境郇伯故城在其北卽注
所謂西逕郇城也自此而西經臨晉入五姓湖皆古
解縣境卽注所謂西逕解縣故城南又西逕瑕城者
也五姓湖卽經所謂張揚池也此涑水故道也厥後
司鹽者慮其侵沒鹽池引而之北自北相鎮之西北
開新道西行經三里高頭里原頭水南香落等村西
何家庄南地名崔家灣者折而南經祁村及臨晉之
南村卿頭等村合姚暹渠入五姓湖雖世代莫考然
故老相傳猶能道其疏鑿之概焉此涑水初改之道

也至明弘治十六年巡鹽曾大有復慮害鹽疏請西
浚新道八十里自崔家灣引而西經祁任智光等村
歷臨晉境至蒲州孟明入河是爲涑水新道云

國朝崔紀永濟縣祀南陽周封公記

或問于予曰官其地而人祀之可也不官其地而祀焉禮歟曰可凡官之祀其地以有功德愛惠也昔者西門豹祀於鄴文翁祀於蜀朱邑祀於桐鄉皆是也且地之有官至衆然或祀或不祀其不祀者又至多而祀於人者常少以知非官之祀而祀其功德愛惠凡有加於人者卽以祀之可此封公所以得乎永濟而爲縣人祀者宜也封公以其子之令於此而來就養於邑之政事若其民人固無與耳其間里之疾苦

氓俗之利病雖視以秦越責勿及焉然特以家人視之如家事治之苟有利乎永濟者必以教其子使無不爲縣以大治而人樂其澤變獷梗爲循良山南之舊俗革矣化爭競於彼此河西之私鬪息矣憫斥鹵之無種而請免其徵善賦稅之易輸而不嚴其法旌必及善罰無遺惡設獎以示教懸析以達冤農勸於勤訟幾乎止凡皆封公勞於中而永濟之人被於外然則雖不官其地其德惠所施邑人實享之雖欲不爲祀而不得也嗟夫子觀近世爲人父兄者其子弟

爲令尹牧守莫不藉以自豐且惟冀其位秩遷進而
已孰有勤勤懇懇不負其民以古良吏爲子勉勗者
封公之賢其過人遠哉予忝縣人之一蓋嘗親見其
所施而歎其澤之不可沒而尤喜直道之公在乎邑
中所以報愛惠於無窮而有是舉也因紀以文俾後
知是祠所從始云

蒲州府志

卷之二十一

六

國朝王會汾書周復初事

周明德字復初河南南陽人少爲諸生通涉經史其人誠信朴厚有經務才身未及仕常欲試而勿得也會乾隆庚申其子遐齡以進士宰蒲之滎河後復調臨晉明德自南陽至教以涖官凡遐齡所未及者導令勉爲之若親撫其民任其事必得當乃已久之遐齡更爲永濟永濟人素聞前在兩邑有名咸喜其來後知所施行一出明德共驚歎曰吾屬向徒以爲明府之賢顧不知本其父愛惠我若此永濟於蒲素難

治其南皆連山去縣甚遠其民大抵獷悍敢拒官府
不聽文告時遣隸卒往或縛而沈之於河前爲令者
畏其頑梗率莫能服明德知狀謂遐齡曰是非實敢
與官抗吾察其情蓋由遠絕城郭愚氓畏官過甚不
避犯上思自捍救以幸脫其死故也夫爲令者當與
民親親則習習則可徐從而化因使遐齡時時入山
中召見其長幼雖井聚杳僻無不悉至且喻且慰勞
之又多載錢物以遺其高年者給勸其耕者山中人
既時與遐齡接後稍稍知馴皆曰明府慈我明德知

其俗可漸變復使遐齡往舉其儉勤謹愿者旌之取其不肖者謂父老曰是素爲惡鄉里吾將法刑之可乎皆曰明府責之是由此咸奉約束樂爲良民數十年凶悍之俗革矣永濟與秦人夾河爲界秦人時以私爭與永濟人鬪河上每千百人彼此相尋若讐寇明德曰鬪則人多傷多傷則爭愈不息莫如約吾民使無以秦怨而以信義布之秦人當自服鬪可終息遐齡如所教爲之已而果然先是邑賦多逋明德知縣掾里胥相倚爲奸謂遐齡曰是徒煩敲扑無益但

好語之導其速償又徧召縣卒賜酒食而問之曰吾行何法課乃早完汝輩任言之因爭以策來獻明德擇其可者授遐齡完課果速因盡去其胥吏之弊者更使其堪任者其後不責一人而歲賦前畢凡永濟稱難治者自遐齡後得從容理之皆明德力也明德在永濟苟可爲縣人利必使其子盡爲之故永濟人尤感其德後數年卒於遐齡官舍永濟人聚而吊哭者萬餘初滎河西境爲陝之韓城有村庄十八土地肥美居者稱富庶自河水決蕩廬舍淪圯衆皆徙去

韓城人因渡河據耕其地及明德至爲滎河人爭而歸之皆歌思不忘明德既卒以喪還永濟人往南陽爲立石墓上復祀之於縣滎河亦時祀焉他日明德嘗在永濟郊行里老不知爲邑宰父也止坐與語問何苦曰河濱田斥鹵不可耕者二百五十頃有餘然徵賦如故以是爲病明德領之去使遐齡力告上官請於朝而免之

蒲州府志

卷之二十一

五

國朝喬光烈河東賑災記

五行之氣不能無偏而災沴作焉堯水以九湯旱以七帝王遇之其軫惻咨嗟經營拯救下民於是託命而陰陽所戾不能害焉我

皇上惠黎元求民莫矜其疾苦予以安全歲祲或逢卽視其重輕加之賑卹往往沛

恩施於常法之外則堯湯之仁也唯河東地斥土燥寡水澤之潤特恃雨暘順若年乃告成或有亢烈卽病歉獲乾隆壬申秋七月旱甚屬城十一日解州曰

永濟曰臨晉曰猗氏曰虞鄉曰滎河曰萬泉曰安邑
曰夏縣曰芮城曰聞喜並以災告而解永濟臨晉安
邑猗氏災尤甚炎風赫曦中野如炙穀之藝者無以
華實粟價日高勢將大饑予以告於中丞方伯而爲
籌其備計雖州縣皆有常平然貯穀恐不足用聞康
熙中令河南歲留漕二十餘萬貯在陝州倘關中儉
荒則以濟之因上議晉中丞救荒有給粟以賑無食
者有出粟令民得借貸者有出粟平價以糶令民得
易市而賈販富人不得增長其值至日益貴以困民

者今河南既多聚粟請移其巡撫借二萬遣官運至之則備者裕而事無患然未即行而豫撫以八月首上疏言中州界連秦晉向時山陝歉收每資豫粟今河南常平穀石尚多比聞山西及陝西皆旱成災者多可於河南漕穀內分撥協濟

上是其言且下晉中丞中丞奏謂臣至河東親勘災傷并籌備賑糶竊以隣省通融不如本省調劑之便今已就近撥運臨汾襄陵太平曲沃翼城浮山岳陽洪洞趙城絳縣垣曲平陸諸縣倉穀八萬二千石又

酌撥霍吉二州及靈石鄉寧平遙介休孝義縣溢額
餘穀四萬三千七百餘石合之解州永濟等十一州
縣常平穀三萬八千石總計爲穀十六萬四千數百
石足以敷用似可不煩再藉豫糧多糜運價也章旣
上所運諸穀亦漸次至遂於十一月行賑事 國家
功令凡縣災僅五分者例不賑卹

詔書使皆賑之其災六分以上民之極貧與次貧者
令加賑一月於是聞喜榮河萬泉芮城諸縣被災輕
者亦計口給食而預卹焉予乃飭官吏分司監散於

縣邑其解州永濟臨晉猗氏安邑則親視給之會是時晉中丞召還京師而少司馬胡公代爲山西巡撫至則首問賑事且以前中丞所言穀已足用不煩借河南其果然否令河東道更計其事予言於胡公今年永濟等十一州縣旱災籌畫賑撫自十一月至正月畧已均敷且令晉賈就陝西榆林販糧而陝省西鳳商販亦由華陰三河口至永濟匝河鎮約五六萬石舉目前論之似可無煩河南粟但來年春至麥秋其期尚遠宜爲預謀合得河南米二萬石其解州永

濟臨晉猗氏災重之區請各貯三千石若聞喜榮河
萬泉虞鄉夏縣稍輕者請各貯米千六百石以待平
價糶之庶幾有備無患宜遣丞倅一人率佐雜數員
於解凍時赴陝州偕其官吏卽其處僦僱船艘自平
陸逆流而上運至大慶關使永濟縣於黃河畔上結
棚舍以收貯之檄令各州縣速相接運則事便而易
集至於榮河萬泉二縣所撥之穀應循黃河直泊榮
河西城外轉運尤便也胡公採其議於正月入告遂
致河南米五萬石云其米分貯永濟者二萬臨晉八

千猗氏虞鄉各六千解州一萬於時貯粟既裕歲雖
災而民不恐穀價亦無翔湧焉其十一州縣在賑列
者計其民男女小大爲數凡二十八萬二百九十四
口其用穀爲數凡十五萬八千九百九十石有零至
十八年夏麥大熟收或過倍河東之人懽踴慶溢咸
謂

天子恩德矜我災青慈噢懇惻是以和氣翔洽轉爲
豐年沐浴咏歌雖官其地者亦爲其民喜予惟古謂
救荒無奇策唯蓄積多而備先具則可恃者焉昔之

賢士大夫任司牧者災未至而先爲籌故臨事從容
經畫盡善富鄭公於青州趙清獻公於越范文正於
蘇民忘其災官不知擾是其可貴也予以陋拙徒欽
其風而勿能逮特官於是當歲氛人饑思爲計安集
以無負

朝廷任使之意而又仰

湛恩之汪濊延及羣生唯與河東之民日頌謳於無
窮云爾

國朝喬光烈雞心灘記

非公無以服天下之爭非和無以集天下之事知其理者虛心平氣不以多尚人之心私求自勝於是定紛處衆或庶幾無失焉乾隆丁卯歲永濟朝邑之民以河灘地相聚訐鬪怨不可解永濟人欲盡得其地種之而朝邑勿服蓋灘生河中兩縣耕者雜田其間且數歲矣永濟名其灘曰雞心朝邑則謂之夾沙自昔秦晉以黃河爲分域然實共之至明隆慶中河徙道穿朝邑南行移朝邑大慶關於東岍由此朝邑與

蒲州永濟地尤近接而河沙漲淤洲渾之生其中者亦兩縣均屬在晉人固不得獨有也先是大慶關鴛鴦諸村民屢以河灘爭動千百人勢若公戰歷康熙雍正中兩遣大官核視爲之區域設界牆限別之然後畧定至是復以灘爭兩省大中丞乃各遣其屬吏約日會境上而爲之議其首議者永濟令費君舉雍正七年例請均其分使永濟朝邑各田其半衆以爲允俄而其說中變凡再遣官持意不能合時予知同州府陝中丞以未曾議也檄使往蒲與其知府李更

共計事予至河東并謁其監司時有議分灘地以爲
永濟當得十之六朝邑僅應得十四者予願唯唯聽
且持其是顧方初時與李蒲州及其監司語尚頗齟
齬又紛覆久之始稍稍合夫以朝邑十四論分地蓋
少予官於秦宜爲秦人袒然竊自計欲私秦人則議
必爭爭則事徒僨而無以定使秦晉之人日鬪河上
相讐益深久失耕業非所以安百姓奉職守且嘗至
所爲雞心灘者而審視之矣其地西厚多腴東薄多
礧以秦之四足以當晉之六是朝邑雖如議言僅應

十四於秦民固無所歉尚欲爲之爭多寡哉是雖未
嘗顯言予固熟籌之非特不敢私且謂爲秦人計當
如是也於是以復陝中丞奏上之章下戶部恐措置
未盡使山陝中丞再遣官勘定明其分界俾爭競永
息兩中丞乃復遣監司四人率予及蒲州府與永濟
朝邑華陰三縣勘議監司雁平道葛公等既至環視
審度咸以灘屬河中本介秦晉間向者永濟人指大
河爲界以拒秦民而官或主之不可爲是唯瀕河田
種之民永濟耕多而朝華耕少宜以四六爲分即在

秦晉無所偏永濟朝華人聞之亦皆謂官於我無所厚薄遂爲明其分界定議以復兩中丞兩中丞訂期親履會勘照議覆奏奉

旨俞允子與署蒲州守李潞安守方率同各縣令丈其地永濟所分得地一百三十六頃四十六畝有餘朝邑所分得地五十三頃二十畝有餘華陰所分得地三十三頃三十二畝有餘仍築牆表樹以別疆域其北界對高家社其南界對鳳皇嘴仍示以康熙中所定山陝奸民之律以禁其爭而其地界於兩河定

爲官產就其已闢者歲徵其租穀令潼關永樂兩司馬收貯之方當丈時予令於灘東沙土薄瘠者除去三百步許不在丈列以與永濟而稍補之蓋予雖非晉吏念秦晉之民猶一也嗟乎是役也其民雖誠貪利多悍易爭然實易處耳向令始時議均分者守而不更卽一言定何致多爲紛紛哉予移河東及三載兩河之民咸帖然故書之以爲雞心灘記

國朝喬光烈萬泉縣新修學宮記

教化爲政治之先學校爲教化之本廟學者人材所
由起禮樂所由興也昔先王建學必祀

先聖先師晉武皇帝皇太子親釋奠於太學元魏文
成帝詔宣尼廟別勅有司行薦享禮凡所以明倫復
古尊崇祀典由來舊矣我

皇上政一教洽文運益隆幸闕里祀太牢屢告天下
郡邑以廣修文廟爲首務備承宣之職者率以崇廟
貌而潔烝嘗仰副雅化作人之意而朝廷卽因是以

殿最守令禮至重也萬泉北顧平陽南瞻潞坂向爲
唐虞甸服山川美淑之氣蔚爲人文窮經嗜古代有
傳家惜以儒術疎畧教化泥於不行有志之士莫不
靡然成風自甘頽惰長民者果有以修明而振作之
安見椎魯無文之鄉不可變爲文章禮樂之區耶邑
宰張君以三韓名俊蒞任茲土登聖人之堂而棟宇
摧殘時懷震陵風雨之憂辛未秋倡捐廉俸邑士大
夫亦樂輸其力以襄盛事於是庀材鳩工自殿廡至
於戟門高其基址大其閤閤翬飛翼棘煥焉惟新次

及名宦諸祠向所有者擴之無者增之而且移建魁樓以復其古設射圃以宏其制屈計若者爲陶若者爲木若者丹堊之役若者匠役之勞經始於辛未之秋落成於壬申之夏美哉是役也張君可爲知所先務矣余惟三代而上教本於身三代而下教寓於法自詩書之道衰上不知所教下不知所學乃并其法而亡之矣今上有

聖天子以立教下有良有司以振興之將見學校修而教化行教化行而民風變民風變而治道彰豈徒

曰修舉廢墜而已哉余故樂觀其成而爲之記

國朝周景柱新遷貢院記

官府小大皆有署而事各不同則署亦異宜所固然也古之臨政者居國之中四方之奔輳取諸萃母取諸渙泄衆宜也古之爲學者必於廣遠靜閒之地聚以處之使安焉專焉不擾不瀆取諸艮勿取諸震造士宜也今夫貢院之設其猶夫學之事也院之中所曹入而試者士之人也院爲學使者署其視郡縣有司居以理訟獄治財賦發號令施教條月吉而戒吏卒徵役而召鄉亭所司異所用異然則郡有貢院非

得其地宜誠不可者乾隆壬申余自寧武移守蒲州
視刺史理所曠無居人隣唯神宮雖在城郭若接垓
野由大門以屬堂皇勢廓而弗整形遠而無制凡官
吏之謁者掾吏入治文書者百役走趨者赴訟聽折
者咸不便其往來而失所瞻觀其於太守蒞政地爲
勿稱焉而其東偏僅里許則貢士之院俯近衢處外
喧內達每當試必架木縛席爲舍以坐士之戰藝者
尚猶不能容因歎始建署者未能審度而兩失其宜
思有以易之久矣於是癸酉之秋始以院爲知府署

而卜遷焉明年甲戌之夏乃以遷署之虛焉者卽爲
學使者署而移貢院於其所易其舊方使從新規立
廳事於大堂之後而撤其故宇改儀門爲重閉而汰
其外闔整廓者使翼如制遠者使肅如內勢嚴以收
外形爽以敞收者足以列號舍布硯席敞者足以待
鵠立之士足以班執事之吏足以備鼓吹旛旌之羅
列而候伺且以如接垌野遠塗巷而違市廛雜瀆不
至聲囂不聞士試其中得靜其心氣專其思慮以獻
其藝卽校士者亦得以其境之靜且閒而評衡益明

以云其宜豈不然哉然則院之移於今余誠知夫事
所不可已而尚惜其不早也嚴陵周景柱記

國朝周景柱開元鐵牛銘

蒲西郭外黃河之岍側有鐵牛四自唐開元中所鑄
凡八其四在秦之朝邑東西分向用以維河橋及金
元世橋廢渡絕而牛之存者如故閱千有餘歲矣牛
之壯碩厥狀雄特所謂一元大武此實稱之觀其矯
角昂首體蹲而力屨足以任重足以勵猛堅足以砥
強足以距其目似怒其耳如聒其處有度其伏甚固
寧戚相之而不名老聃跨之而不去爲牡爲犝爲犍
爲軀在河之濬相伺相煦豈特三朝三暮而見黃牛

之如故且其膚澤晶瑩若燦金英彩爛初陽之照耀
盪乎銀燭之光明疑來從於雪山同天犧之有靈蓋
世遠代積飽乎霜露之浸潤而多受夫月華與日精
是以其態之古而且異有如是也自牛之外有柱有
山並鐵爲之牛各有牧或作先牽或作迴叱其面目
意色各宛然肖發想其初時巧倕共工妙範在中罄
南山而取鐵爍萬冶而未窮於是扇太乙鞴祝融下
昆吾走雷公天藝絳氛地吹炎風旣陶旣模剖型而
始呈厥功可以驕翁仲之範金可以陋蜚廉之鑄銅

而况橋如長虹竿如游龍纜之維之如砥如墉將使
元魚失其怒陽侯斂其雄屬非斯牛之力而又誰主
其庸哉嗟乎自唐以後歷五代宋元明所謂開元文
物之盛久已蕩爲飄風散爲寒烟不可復問而是牛
歸然傑然未嘗或改弔古者將撫之以增永歎覩之
以成感慨自是以往更數百歲吾不知其尚吼焉莫
置乎抑亦終失而淪於波臣乎或如辟邪天鹿毀於
人乎或高岸爲谷而復於土乎是皆莫能測也唯今
儼然在陳嶷嶷嶽嶽實爲斯地之偉觀而壯景物之

勢且其年載垂之甚古而唯欲其永存也夫牛之爲物於易象坤坤爲土土以勝水余觀秦李冰爲蜀守導江刻石爲三牛於岍側蓋牛之足以勝水恠而鎮其患者久矣唐之爲此雖曰以成河橋亦猶陰陽相壓之意焉既觀而偉古人之功因爲之銘曰

牛之壯兮若山峙角矯矯兮觸蒼兕河流安兮天吳逝牛戢戢兮載閒怒浪息兮無凌湍東靜魏壤兮西晏秦關不奔不鬪從爾友萬歲千秋爾斯守

五姓湖記

周景柱

湖當臨晉虞鄉間縱廣環迴可數十里古者所謂張揚之池也其稱五姓不知始何時或曰昔湖中有五姓漁者人因以名云余少讀漢書曹相國與淮陰侯信攻魏將孫林邀于東張未識其地何所後讀水經及注始知爲涑川所經因考地志湖接桑泉帶剗首面中條空浮翠涵景象多有往往想見其處乾隆壬申自寧武移守來蒲以事往臨晉因得至湖所臨晉人云前時環陂皆樓閣亭館雜樹桃李丹綺照耀酒

帘歌箏遊者簇集波光渺瀰吞漾雲日烟艇往來泛
狎鷗鶩光景良勝今湖就涸者久佳賞麗矚曩昔殊
異惜予之不及見然漪吹練滌猶足悅心目曠志趣
蓋山西諸郡多叢山廣原陂澤川池所在鮮少一日
得此江鄉之思悠然自生予之所以流連於是矣至
明年而水之涸者復生又明年方有事涑姚之渠遂
并湖濬之浩淼彌望浮碧無際湖中有堤橋影參差
樹色映掩行人往來儼若圖畫湖先多魚自既涸而
民失網罟之利及是水日益盈魚亦日愈衆癸酉之

冬衆師棹入者舟數十比甲戌已百餘今年乙亥且
二百蓋合臨晉虞鄉永濟三縣之人皆往焉四方諸
郡或先賦以金而後償魚計其利歲可數萬夫陂毀
鴻卻黃鵠託歌練湖既復懽傳丹陽蓋民之畏奪其
資而喜得其獲也左傳言衛文公元年三十乘季年
乃三百乘今湖魚之美有似於此予又以喜其利之
無窮若夫移畫舫泛清泠擘蒲荷之芬芳狎鳬雁之
翔泳太守得以官政暇餘與邦人相羊其際既以快
其觀娛且得以利及民者美是湖而爲蒲人慶尤有

樂乎此也乃爲之記

蒲州府復涑姚二渠記

胡天游

蒲晉之坤河帶如玦川在州域北汾南涑涑自唐都督薛萬徹導水夏縣至臨晉西委張澤入於河解之平陸泉出橫嶺澗合溪赴會流以盛隋都水姚暹渠引焉至蒲虞鄉縣澤首受亦西入於河然暹所引本北魏時永豐渠舊而酈善長謂涑水西逕郇瑕又西南逕張揚城屬於陂則非萬徹暹所始營唯二渠源瀆山谷悍挾泥沙時時壅不循其理久益爲變暹徹所以條其攸歸必使之復去害致利以予其民宜著

史書稱名勿絕至今渠自兩人後開塞幾變近廢不治
瘳甚而張澤者即善長書涑所屬陂今以爲湖變
其名五姓湖故瀦渠郵以輸河涸三數十載鯁前時
入河道凡二渠積閼流當就湖者或不能至若夏秋
會甚風淮雨噓漲鼓怒涑衝暹渠力併壯決敗解鹽
池蕩廬稼駿撼郭邑因飈注湖莫有洩容游波踔騰
四齧原陸蒲解之人用爲困河東兵備道喬公涖蒲
三年政理孔成邦俗大和前寧武太守周侯用循賢
移知蒲府事相與謀吾民幸保生聚樂安業今數縣

氓庶釋谷畢恬猶若未者且解池繫國賦鉅唯水是
病却蓄底輯使無濫沈川瀆順性歲種時慶經務之
要莫急且先乃召父老告以渠河興罷孰利咸曰苟
導復之利世世於是計涑與暹渠左右夫家其田溉
潤得及者率戶役焉其非蒲所治而統於河東爲解
州以畀其守其在蒲縣四曰猗氏臨晉虞鄉永濟周
侯董其令分主之以爲禹治水施先下流湖渠同時
乃畚乃鑿乃疏乃穿乾隆甲戌春正月水功是興逮
四月成自解安邑屬蒲永濟三百餘里循渠樹防翼

翼傑傑式砥式遏而邸家營者介虞鄉猗氏勢尤南
庠異時涑橫擣入里爲巨浸狂溜勇洶地益底深岍
高下絕懸五六丈崩口不可塞合周侯謂此涑要害
如軍陳攻守必爭險勝出俸錢買其傍田盡土實之
奪其凶門卒杜服上爲其堤崇築加仞厚固彌鞏責
官吏以時衛於是憤帖鬱宣潦縮其暴乎野者壤出
其淪於墊者昔若食得饁茲委壑如紡土燥厥穉復
於田耕塗權里歌忘其恐難方役之興公及周侯躬
巡渠所勞其人勿怠日夕既訖徧酒肉賚賜慰遣焉

悅以先民佚道使衆君子于事有如此今夫去疾病而復於壯者之爲復國地失而復克取有之之謂復城郭道路陂澤隄渠其既廢而治興焉之謂復修其圯功攘其患用其利猶起膏肓奮武烈均乎大庸予診斯謀美河東公功太守侯之勞烈同德協慮康享民視暹萬徹所爲尤有尚思揚其光嘉昭無休且告繼爲政者師循之亦克保奠以終永厥績毋隳

蒲州府志

卷之二十一

三

創建河東書院碑

牛運震

將爲築宮於名山大川之間踞敞壇遠市闐廊廡周
起樹木交蔭堆經籍萬卷其中廝生徒百數十人映
旭缸膏而讀之又得名世者爲之師經義治事弦誦
文章殷殷金石動天地書院之設亦盛矣哉然而因
其地乘其時湏其人資其財事之所難昔人以爲歎
河東書院初建於蒲州東五里峨眉原明正德中同
知呂經毀泰山祠而爲之國朝雍正中復州爲郡
知府某徹書院之材以爲郡署而別建來復書院於

城內湫如蕪如殆不可居書院之廢始於此往時蒲
州爲人文蔚拔之區甲科騰奕冠蓋如雲士大夫以
術取卿相令長政事文學之績衣被海內及書院廢
鈴鐸瘖舌經肆榛棘成人小子奔走耕估之事登鸛
雀樓而望之蒲城郭之氣黯然於是觀察喬公光烈
蒞河東五年矣當是時

天子方崇闡經術播敷文教

詔直省設書院延經師諸憲司恪董其事郡州縣以
次具舉而

國家平定西陲揚威萬里武功旣燁文德益昭

詔廣科額獎進多士而蒲當秦晉衝實惟帝嬀氏揮
弦歌南風之故地后夔司徒契之所典樂而敷教也
然齋舍不設學徒解散豈古今風俗與世移易抑何
以佐政化宣揚

天子之典命觀察曰是吏有司之責其可以辭廼以
其帖下府府帖下縣皆報曰敢不力先是郡治有試
院制差狹學使者按部諸生童子不足以容太守周
公景柱因以試院爲郡署而空郡署弗居曰此前人

所毀書院也與爲太守居毋寧爲經師諸生徒居矧
三年一學使者來諸應試者得寬然揀管其中試院
仍不廢加恢廣是一舉復書院之舊而兼得一試院
也上其狀觀察觀察曰善於是永濟令張公淑渠考
所以爲書院者曰舊書院學田八十畝書院廢基三
十八畝來復書院廢基七畝四分永樂書院學田六
十二畝本城北關社學田租爲石者三十有八首陽
書院生息銀爲兩者三百悉撥輸書院以爲修脯膏
火之資不敷者觀察太守及郡之屬六縣割廉俸益

之當是時黃河以東中條以北觀察所治三十五州
邑知名之士咸檄調來蒲太原平定諸生千里聞風
雲集河外陝之大荔郃陽朝邑皆觀察舊治諸生負
笈渡河來學書劍載道衿帶盈門廊舍墻廡之制几
案床簀之屬庖湍盥燎之器縹帙槩削之具悉張公
先期供置人至如歸弦歌不輟日省月課蒸蒸咸進
然後蒲之人士咸知觀察太守及郡屬六縣之長吏
能振興文教相與以有成也山長牛運震覩其事而
壯之曰盛哉事失人則崩得人則興壞之者用力易

成之者爲功難昔之人嘗毀神祠爲書院後之人奪
爲公廨其壞之也不可謂不力然而卒復爲書院者
是亦有天道焉孰知奪而壞之者之爲書院地耶惟
觀察克善厥始惟太守克協厥中惟大令張公克成
厥終人事與天道際而爲蒲郡千載一時之舉昔之
人其謂今何後之人其謂今何則召諸生誨之曰黃
河不涸所以成其大中條不泐所以成其高論語曰
百工居肆以成其事又曰事其大夫之賢者友其士
之仁者其河東書院之謂乎諸生生

聖世遭良有司又處名勝地先聖先賢伯夷叔齊段
干木文中子薛文清之典刑具在諸生勉乎哉敬業
樂群親師取友啟發篇章敦習禮教士氣一新風俗
丕變以培振河東之文教以爲

國家億萬年宣化承流之區咸于是乎始

列州府志

卷之二十一

四

國朝周景柱靜師堂記

曹相國治齊迎事蓋公師其清靜俗以大化夫漢世
良二千石見傳記者類多作爲震動播其理績相國
獨以靜得之若無跡可見然所爲循吏亦未有及參
者豈非靜之爲用大而效甚美歟老子曰動爲輕根
靜爲躁君爲郡者奉朝廷命守土撫民任重事多多
常易紛紛乃躁躁乃中愈煩而益難理唯靜故暇暇
則能整雖萬千紛投甚龐至劇可從容有餘晏閒無
事而與人休息相忘其際俗何由不寧世爲吏者簿

書牒訴倥傯雜獵中昃向晦或不得食與寢對案太
息勞劬自苦意非不欲無事而使人率也然教令且
日出刑章且日喧躬愈煩萌起愈滋衆故曹相國曰
毋擾獄市獄市本易省擾乃不勝何有於理予前守
寧武爲邊郡其風樸淳訟寡務閒旣而移蒲於古三
河稱最劇民氣悍剛習囂譁難爲柔馴又地當往來
之交過客使者時蠡午非賢且才奉職不易恐煩無
以應而或出於擾也斬自得師未知其旨居三年少
間客有陳蘇氏蓋公堂記於郡齋中因喟然起曰持

方者唯良擇術者唯要世以黃老清淨儒者勿稱然
孔子於子桑伯子特可其簡簡非清靜之謂耶孔子
言去山十里蟋蟀之聲尙猶在耳謂爲政惡譁貴肅
惟肅乃簡清靜備焉然則公之教安得以黃老少之
相國師公而齊治異時入代鄴侯民以寧一參特以
其效於齊者推行之苟得其意治大國若烹小鮮况
乎區區一郡間哉公旣以清靜師相國予且欲以師
相國者師公竊懼未能先是府舍頗隘乾隆甲戌修
貢士院因其餘材於乙亥之夏就廨東偏治堂宇址

不足買傍地廣之前列楹五以會賓客後列楹九暇
時讀書布視席其中思晏蒲之人與爲無擾勝曰靜
師以日自省焉

重建八蜡廟碑

牛運震

能作宮廟以處神而奉神之所爲以治民則可謂良吏矣記伊耆氏始爲蜡蜡之神有八先嗇也司嗇也百種也農及郵表畷也猫虎也坊與水庸也鄭氏注以昆蟲爲八蜡之一而百種不數孔穎達因之王肅說八蜡分猫虎爲二無昆蟲按百種者百穀果木之種記曰祭百種以報嗇也則百種之爲蜡之神章矣猫虎者二物而當一神爲其同氣也蜡之祝辭曰昆蟲毋作草木歸其澤此其報饗而歸功神明不得又

以昆蟲爲神如使昆蟲而神安在草木獨不神耶且
昆蟲螽蟴害稼之物蜡旣祀猫虎矣而又祀昆蟲不
亦溷且贅乎然則八蜡者以陳祥道禮書之說爲斷
無疑也然余有異焉古者事神治人之道合而吏事
昌蜡之祭也爲息老物也萬物莫不落於兌閉於坤
而休於艮神之勞矣而節適之夫神非有手足筋骨
之業而有屈伸升降之能猶將偃性歸根退處位默
况橫目而人面者乎其斲乎休養生息而無不欲厭
其志可知也古之君子使之則必報之彼郵表啜坊

水庸皆細微無有知之物吹豳擊鼓以衍疆章其報之也大矣爲民牧者操其肩胝而輿馬舂鍾役之其事萬於使神食若力傭若直宜何如報也且猫虎爪牙猛鷺之獸猶汲汲搏鼠毆豕爲民除害寧有儼然爲萬人父母而猫虎之不若者然則爲吏者有廬舍以處其氓黎有茂草以處其禽獸有水壑以處其蟲豸神人不擾民氣和鬯然後歲十二月酒食鼓簫以來之皮弁素服以送之庶幾順成而蜡通神其醉飽而無恫容矣乎張君淑渠作令永濟蓋有志於瘳其

民者重建八蜡廟旣成而索言於余余爲攷正八蜡之神而假諸息神人之說以告之

國朝牛運震遊五姓湖記

蒲郡太守周侯旣濬五姓湖之三年余與浙東胡稚威及周侯永濟令張君萬泉令畢君泛舟於湖是湖滙永濟臨晉虞鄉三縣之交南浸中條之麓北接桑泉東受姚暹渠鴨子池諸水西抵趙伊鎮輪於涑水周環六七十里五老諸峯倒影其中孤山峩眉岡遠空涵翠復映帶之十月二日余與張畢二君先後至湖已而周侯自虞鄉却來輿迎胡君達湖上當是時漁人篙工及湖山農民百數十人咸艤舟以待明日

登舟由南岍放乎中流綠嵐微暈紅林未脫風平煙
淨湖光潏灩白雲橫抹橋影參差已而扣舷載詠舉
酒相屬高譙轉清極望曠渺樂可知也然而漁人農
父有歌於舟中者隸卒按拍吹笛和之漁之柔流而
施罟者罟聲與歌相荅也當是時周侯推酒饌以饗
耕牧之民俯仰雲水四顧洲原爲說鄉土山川風景
之勝晴雨桑麻伏臘賽酺之樂移舟促棹酒酣耳熱
雜引杯觴高索果栗若不知有太守公者鳬雁謹聲
林木交舞日暮景轉夷猶不厭夫牧有司不可以遊

覽爲事彼其部領文奏一日之翫則廢之矣矧其朱
幡皂蓋鹵簿騶騎於山水之趣何有哉謝靈運之泛
麻源山簡之醉高陽池吾意其掾吏猶苦之爲之民
者願安所得其焉如使僕僕鑿山谷供帳具則民不
利有風雅之使君可知也至若逸人畸士往往幅巾
竹杖喜自放於山巔水湄之外一遇達官畫舸鼓吹
則有欸乃一聲棹烟港荻浦而去耳夫又安從致之
然則周侯今日之遊其何以爲此樂也哉然湖當昔
盛時環陂皆樓閣亭館桃李霞綺酒旗歌管晝映簇

集近湖之淤且涸者百有餘年幾成智池周侯疏涑
水河併湖濬之今之清波潏漾彌望浩淼者周侯力
也淺有菰蒲深有葭葦魚蝦之產歲千萬石湖之民
攜而弋其利者倍禾稼之入扶老艾抱孩穉熙熙於
山色湖光之中者朝夕徧焉乃今周侯得一遊遊而
山農澤畛益得有其樂然則湖自周侯始湖之游亦
自周侯始是使湖之民利有湖併利有周侯雖謂周
侯治蒲如斯遊可也舍是而鼓櫂西湖之波探奇漢
陂之澳其樂又豈有易於此於是余與胡君稚威廼

肯與太守遊張畢二君曰不可以弗志也遂記之

蒲州府志

卷之二十一

三

國朝周景柱首陽山夷齊廟碑

天地有和肅肅爲秋冬其氣至清得其氣者其人行
至高性至潔不可一世孤往邁絕上抗遼古視天下
無足與適而安其身此與天爲徒者伯夷叔齊是也
論語記其餓於首陽後言二子者異說雜出謂二姓
之際耻食周粟甘死採蕨嗚呼予觀三代下士抗志
節不肯易身若此蓋有何必夷齊能然且僅若是安
足盡夷齊大抵二子居身至潔高絕自處憫俗爲汙
舉時皆非甘餓不悔豈特區區殷周間事乎孟子謂

伯夷絕惡人朝衣冠坐塗炭若將浼已去恐不速又
曰聞伯夷之風頑夫廉懦夫立夫天地旣肅華者苓
脆者堅柔者烈莫不凜慄去其靡敝彼二子者天地
不周廣莫之風也非是無以震易一世斯爲聖人之
清子以爲知二子莫若孟子湯旣放桀讓天下於務
光務光耻焉自沈於河行頗夷齊顛然不聖光獨聖
夷齊蓋二子之清其與人甚厚嫉惡至嚴者以君子
望待天下幾盡去濁而歸乎潔則聖人之心焉昔時
議者或謂伯夷皇民雖虞夏之帝猶不得而用况乎

商周予然後知扣馬以諫當無其事特出史書之誣
彼豈不知紂之當伐武王不可說止而尙爲是哉諫
焉勿聽始乃就餓奚以成其高卽登山作歌馬遷所
錄要亦勿足多信若莊周之徒以二子爲近名殆與
東方生指稱古之愚夫滑稽放言君子所棄呂不韋
謂武王葬伯夷用將軍禮陳彭年假春秋少陽墨允
墨智妄爲姓名尤鄙且野何後世之多惑也予登首
陽瞻墓祠讀所列碑皆少能得夷齊意如孟子說書
石發之

蒲州府志卷之二十二

藝文詩

伯夷叔齊西山歌

登彼西山兮采其薇矣以暴易暴兮不知其非矣神
農虞夏忽焉沒兮我安適歸矣吁嗟徂兮命之衰矣
舊州志平陽府志並載舜南風卿雲耕田諸歌
是雖風雅逸篇古琴操樂錄及詩所苑乘馮氏
古紀皆有之要不知其出於後人之妄託而無
足取也今並不採近猗氏志首列下泉四章則

六經之文何假復載乎唯夷叔之歌太史公以爲逸詩出於史記而尤爲近古且於地之掌故爲最切特採以冠藝文諸詩

漢武帝秋風詞

秋風起兮白雲飛草木黃落兮雁南歸蘭有秀兮菊有芳懷佳人兮不能忘泛樓船兮濟汾河橫中流兮揚素波簫鼓鳴兮發櫂歌懽樂極兮哀情多少壯幾時兮奈老何

南齊陸厥蒲坂行

江南風已春河間柳堪把雁返無南書寸心何由寫
流泊祁連山飄飄高闕下

梁劉遵蒲坂行

漢使出蒲坂去去往交河間謀敢虧對驂馬脫鳴珂
乍作渡瀘怨何辭上隴歌

遵齊梁人山西通志作晉者非

後周庾信就蒲坂使君乞酒

瀟瑟風聲慘蒼茫雪貌愁鳥寒棲不定池凝聚未流
蒲城桑落熟灞岸菊花秋願將河朔飲分勸東陵侯

州舊志所載古詩有宋南平王劉鑠過歷山湛
長史草堂并湛茂之和作然彼所謂歷山蓋江
南地與此無與也

唐玄宗曉渡蒲津

鐘鼓嚴更曙山河野望通鳴鑾下蒲坂飛旆入秦中
地險關逾壯天平鎮尚雄春來津樹合月落戍樓空
馬色分朝景雞聲逐曉風所希常道泰非復候繻同
曉渡蒲關平陽志作早發蒲津非是

唐玄宗登蒲州逍遙樓

長榆息烽火高柳靜風塵北征巡九洛展豫出三秦
昔是潛龍地今爲上理辰時平乘道泰邁賞遇年春
黃河分地絡飛觀接天津一覽遺芳翰千載肅如神

唐李嶠汾陰行

君不見昔日西京全盛時汾陰后土親祭祠齋宮宿
寢設齋供撞鐘鳴鼓樹羽旗漢家四葉才且雄寶延
萬靈服九戎栢梁賦詩高宴罷詔書法駕幸河東河
東太守親掃除奉迎至尊導鑾輿五營將校列容衛
三河縱觀空里閭回旌駐蹕降靈場焚香奠醑徼百

祥金鼎歆發正焜煌靈祇煒熠攄景光埋玉陳牲禮
神畢舉麾上馬乘輿出彼汾之曲嘉可遊木蘭爲檝
桂爲舟櫂歌微吟彩鷁浮簫鼓哀鳴白雲秋歡娛宴
冶賜君后家家復除戶牛酒聲名動天樂無有千秋
萬歲齊山壽自從天子向秦關玉輦金車不復還珠
簾羽蓋長寂寞鼎湖龍髯安可攀千齡人事一朝空
四海爲家此路窮雄豪意氣今何在壇場宮苑盡蒿
蓬路逢古老長嘆息回環世事不可測昔時青樓對
歌舞今日黃壤聚荊棘山川滿目淚霑衣富貴榮華

能幾時不見只今汾水上惟有年年秋雁飛

唐宋之間登逍遙樓

逍遙樓上望鄉關綠水泓澄雲霧間此去衡陽二千里無因雁足繫書還

唐杜審言和李大夫存卹河東

六位乾坤動三微歷數遷謳歌移火德圖讖在金天
子月開階統房星受命年禎符龍馬出寶籙鳳凰傳
地卽交風雨都仍卜澗瀍明堂惟御極清廟乃尊先
不宰神功運無私大象懸八荒平物土四海接人烟

已屬羣生泰猶言至道偏重書傍問俗旌節近推賢
秩比司空位官臨御史員雄詞執刀筆直諫下樓船
國有大臣器朝加小會筵將行備禮樂送別仰神仙
城闕周京轉關河陝服連稍觀汾水曲俄指絳臺前
姑射聊長望平陽遂宛然舜耕餘草木禹鑿舊山川
昔出諸侯靜無何霸業全中軍掃戰敵外府絕兵權
隱隱帝鄉近瞻瞻肅命虔西河偃風俗東壁掛星躔
井邑枌榆社陵園松柏田榮光朝掩代佳氣曉侵燕
雨霽鴻私滌風行睿旨宣厚發訪疾苦屠釣採貞堅

人樂逢刑措時康洽賞延賜逾秦氏給恩倍漢家錢
擁傳咸翹首稱觴競比肩拜迎彌道路舞詠溢郊鄘
殺氣西衝白窮陰北上玄飛霜遙渡海殘月迴臨邊
緬邈朝廷問周流朔塞旋興來探馬策俊發抱龍泉
學總八千卷文傾三百篇澄清得使者作頌有人焉
未以崇班閎而云勝託捐偉才何磊落陋質幾翩翹
江海寧爲讓巴歛輒自牽一聞歌聖道助曲荷陶甄

唐張說奉和聖制曉渡蒲關

蒲坂橫臨晉華芝曉望秦關城雄地險橋路托天津

樓映行宮日隄含苑樹春黃雲隨寶鼎紫氣逐真人
東詠唐虞迹西觀周漢塵山河非國寶明主愛忠臣

唐張說和經河上公祠應制

河上無名老知非漢代人先探道德要留待聖明辰
玄妙爲天下清虛用谷神化將和氣一風與太初鄰
靈廟觀遺像仙歌入至真皇心齊萬物何處不同塵
地志蒲津西舊有河上公祠

唐蘇頲奉和聖制登蒲州逍遙樓

王昔堯舜禹遺壘成典謨聖皇東巡狩况乃經此都

樓觀紛迤邐山河幾縈紆
緬懷祖宗業相繼文武圖
尚德既無險觀風諒有孚
豈知汾水上簫鼓事遊娛

唐宋璟蒲津迎駕

回鑾下蒲坂飛旆指秦京
雒上黃雲送關中紫氣迎
霞朝看馬色月曉聽雞鳴
防拒連山險橋長壓水平
省方知化洽察俗覺時清
天下常無事空餘襟帶名

唐徐安貞奉和曉渡蒲關應制

仙掌臨秦甸虹橋闢晉關
兩鄉分地險一曲渡河灣
路得津門要時清古戍閒
城花春正發岸柳曙堪攀

後乘猶臨水前旌欲換山
長安回望日宸御六龍還

唐張九齡駕幸河東

魏武中流處軒皇問道回
長隄春樹發高掌曙雲開
龍負王舟渡人占仙氣來
河津會日月天仗役風雷
東顧重關盡西馳萬國陪
遙聞股肱郡元首詠康哉

唐李適后土祠

昔予讀舊史徧睹漢世君
武皇實稽古建此百代勲
號令垂懋典舊經備闕文
南巡歷九嶷船艫被江濱
勒兵十八萬旌旗何紛紛
竭來茂陵下英聲不復聞

我行歲方宴極目山河分神光終冥漠鼎氣獨氛氲
攬涕步睢上登高見彼汾雄圖今安在飛飛有白雲

唐吳筠咏夷齊

夷齊互崇讓棄國從所欽聿來及宗周乃復非其心
世濁不可處冰清首陽岑采薇詠羲農高義越古今

唐李頎謁夷齊廟

古人已不見喬木竟誰過寂寞首陽山白雲空復多
蒼苔歸地骨皓首採薇歌畢命無怨色成仁其若何
我來入遺廟時候微清和落日吊山鬼回風吹女蘿

石門正西豁引領望黃河千里一飛鳥孤光東逝波
驅車層城路惆悵此巖阿

唐李頎贈張元素先生

先生谷神者甲子焉能計自說軒轅時於今幾千歲
寓遊城郭裏浪跡希夷際應物雲無心逢時舟不繫
霞食斷火粒野服兼荷製白雲淨肌膚青松養身世
韜精殊豹隱鍊質同蟬蛻忽去不知誰偶來寧有契
二儀齊壽考六合隨休憩彭聃猶嬰孩松期且微細
常聞穆天子更憶漢皇帝親出萬乘尊將窮四海裔

車徒徧草木錦帛招談說八駿空往還三山轉虧蔽
吾君感至德元老欣來詣受籙金殿開清齋玉堂閉
笙歌迎拜首羽帳崇嚴衛禁柳垂香爐宮花拂仙袂
祈年寶祚廣致福蒼生惠何必待龍髯鼎成方取濟
元素卽張果曾隱中條

唐王昌齡駕幸河東

晉水千廬合汾橋萬國從開唐天業盛入沛聖恩濃
下輦回三象題碑駐六龍睿明懸日月千載此時逢

唐王之渙河中鸛雀樓

白日依山盡黃河入海流欲窮千里目更上一層樓

唐岑參送祁樂歸河東

祁樂後來秀挺身出河東往年詣驪水獻賦甘泉宮
天子不召見揮鞭遂從戎前日還長安囊中金已空
有時忽乘興畫出河上峰床頭蒼梧雲簾下天台松
忽如高堂上颯颯生清風五月火雲屯氣燒天地紅
鳥且不敢飛子行如轉蓬少華與首陽隔河勢爭雄
新月河上出清光滿關中置酒灞亭別高歌披心胸
君到故山時爲吾謝老翁

唐岑參題永樂韋少府廳壁

大河南郭外終日氣昏昏白鳥下公府青山當縣門
故人是邑尉過客駐征軒不憚煙波濶思君一笑言

唐韋應物送姚係還河中

上國旅遊罷故園生事微風塵滿路起行人何處歸
留思芳樹飲昔別暮春暉幾日投關郡河山對掩扉

唐姚係五老峰大明觀贈隱者

雲觀此山北與君攜手稀林端涉橫水洞口入斜暉
乍見鸞鶴邈忽爲煙霧飛故人清和客默會琴心微

丹術幸可授青龍當未歸悠悠平生意此日復相違

唐閻防與永樂諸公夜泛黃河

烟深載酒入但覺暮川虛映水見山火鳴榔聞夜漁
愛茲山水趣忽與人世疎無暇燃宮燭中流有望舒

唐儲光羲河中望烏灘作

河流有深曲舟子莫能知弭櫂臨沙嶼微吟西日馳
平明春色霽兩岍好風吹去去川途盡悠悠親友離
漢宮成羽翼伊水弄參差爲惜淮南子如何攀桂枝

唐耿漳晚秋東遊寄猗氏第五明府

步出青門去疎鐘隔上林四郊多難日千里獨歸心
暮鳥聲偏苦秋雲色易陰亂墳松柏少野徑草茅深
灞浹袁安履汾南宓賤琴何由聽白雪祇益淚霑襟

唐耿漳送胡校書歸河中

古樹汾陰道悠悠東去長位卑仍解印身老又還鄉
河水平秋岸關門向夕陽音書須數附莫學晉嵇康

唐耿漳鸛雀樓

久客心常醉高樓日漸低黃河經海內華嶽鎮關西
去遠千帆小來遲獨鳥迷終年不得意空覺負東溪

唐耿漳奉和李觀察河中白樓

城上高樓飛鳥齊從公身遂躡丹梯黃河曲盡流天外
白日輪傾落海西玉樹九重常在夢雲衢一望杳如迷
何心更和陽春奏况復秋風聞戰輦

唐盧綸奉和馬侍中宴白樓喜雨

鸛鶴相呼綠野寬鼎臣閒倚玉欄干洪河擁沫流仍急
蒼嶺和雲色更寒豔豔風光呈瑞歲冷冷歌頌振琕盤
今朝醉舞共鄉老不覺傾欹獬豸冠

唐盧綸和李益遊棲巖寺

木香雨氣新山寺綠無塵遂結雲外賞共遊天上春
鶴鳴金闕麗僧語竹房隣待月水流急惜花風起頻
何方非壞境此地有歸人迴首空門路皤然一幻身
座不知澆酒爲何人

唐盧綸題伯夷廟

中條山下黃礪石壘作夷齊廟裏神落葉滿堦塵滿
唐盧綸同薛存誠登棲巖寺

衰蹇步難前上山如上天塵泥來自晚猿鶴到何先
萬壑應孤磬百花通一泉蒼蒼此明月下界正沈眠

唐李益遊棲巖寺

晚上曇延洞通宵興莫窮
高明千嶂月清爽一巖風
坐久衣衫潤吟餘物象空
舉頭星可摘疑在廣寒宮

唐李益鸛雀樓

鸛雀樓西百尺牆
汀洲雲樹共茫茫
漢家簫鼓空流水
魏國山河半夕陽
事去千年猶恨速
愁來一日卽爲長
風烟併起思鄉望
遠目非春亦自傷

唐暢當鸛雀樓

迥臨飛鳥上高出世塵間
天勢圍平埜河流入斷山

唐韓愈送侯參謀赴河中

憶昔初及第各以少年稱君頤始生鬚我齒清如水
爾時心氣壯百事謂已能一別詎幾何忽如隔晨興
我齒豁可鄙君顏老可憎相逢風塵中相視迭嗟矜
幸同學省官末路再得朋東司絕教授遊宴以爲恒
秋漁蔭密樹夜博燃明燈雪逕抵樵叟風廊折談僧
陸渾桃花間有湯沸如烝三月崧少步躑躅紅千層
洲沙壓晚坐嶺壁窮晨昇沈冥不計日爲樂不可勝
還滿一已異乖離坐難憑行行事結束人馬何躑騰

感激生膽勇從軍豈嘗曾洸洸司徒公天子爪與肱
提師十萬餘四海欽風稜河北兵未進蔡州帥先薨
曷不請掃除活彼黎與烝鄙夫誠怯弱受恩愧徒弘
猶思脫儒冠棄死取先登頗欲面言事上書求詔徵
侵官固非是妄作譴可懲惟當待責免耕斲歸溝塍
今君得所附勢若脫鞬鷹檄筆無與讓幕謀職其膺
收績開史牒翰飛逐溟鵬男兒貴立事流景不可乘
歲老陰沴作雲頽雪翻崩別袖拂洛水征車轉崤陵
勤勤酒不進勉勉恨已仍送君出門歸愁腸若牽繩

默坐念語咲痴如遇寒蠅策馬誰可適晤言誰爲應
席塵惜不掃殘罇對空凝信知後會時日月屢縵組
生期理行役歡緒絕難承寄書惟在頻無恡簡與繪

唐韓愈條山蒼

條山蒼河水黃浪波紆紆去松栢在山崗

唐呂溫蒲津關河亭作

息駕非窮途未濟豈迷津獨立大河上北風來吹人
雪霜自茲始草木當更新嚴冬不肅殺何以見陽春

唐楊巨源爲河中少尹酬盧員外

謝傳旌旗控上游
盧郎罇俎借前籌
舜城風土臨清廟
魏國山川在白樓
雲寺當時接高步
水亭今日又同遊
滿筵舊府笙歌在
獨有羊曇最淚流

唐楊巨源后土祠送田徹

清明千萬家處處是年華
榆柳芳辰火梧桐今日花
祭祠結雲綺遊陌擁香車
惆悵田郎去原頭煙樹斜

唐楊巨源五老峰下費君書院

解向花間栽碧松
門前不負老人峰
已將心事隨身隱
認得溪雲第幾重

唐裴度寄河中楊少尹

誰道重遷是舊班
自將霄漢比鄉關
二妃樓下宜臨水
五老洞西好看山
再葺吾廬心已足
每來公府路常閒
詩陪亞相逾三紀
石筍煙霞不共攀

唐馬戴鶴雀樓晴望

堯女樓西望人懷
太古時海波通禹
鑿山木閉虞祠鳥
道殘虹挂龍潭返
照移行雲如可馭
萬里赴心期

唐杜牧駕幸河東

捷書皆應睿謀期
十萬曾無一鏃遺
漢武慙夸朔方

地周宣休道太原師威加塞北寒來早恩入河源凍
去遲聽取滿城歌舞曲涼州聲韻遠參差

唐項斯舜城懷古

禪禹繼堯聰巍巍盛此中四隅咸啟聖萬古賴成功
道德去彌遠山河勢不窮停車一再拜帝業卽今同
唐姚合送徐員外赴河中從事

赤府從軍美儒衣結束輕涼颺下山寺曉浪滿關城
閒坐饒詩景高眠長道情將軍不戰術計日立功名

唐賈島送覺興上人歸中條

又憶西巖寺秦原草白時山尋樵徑上人到雪房遲
暮磬潭泉凍荒林野燒移聞師新譯偈說擬對旌麾

唐賈島送徐員外赴河中

原野正蕭瑟中間分散情吏從甘扈罷詔許朔方行
邊日沈殘角河關截夜城雲居閒獨往長老出房迎
唐顧非熊經河中

一望蒲城路關河氣象雄樓臺山色裏楊柳水聲中
思起懷吳客行斜向磧鴻我來尋古跡唯見舜祠風
唐李商隱永樂縣所居一草一木無非自栽今

悉已芳茂因書卽事

手種悲陳事心期玩物華
柳飛彭澤雪桃散武陵霞
枳嫩棲鸞葉桐香待鳳花
綬藤縈弱蔓袍草展新芽
學植功雖倍成蹊跡尚賒
芳年誰共玩終老邵平瓜
唐李商隱渾河中

九廟無塵八馬回奉天城壘
長春苔咸陽原上英雄
骨半向君家養馬來

唐李商隱所居永樂縣久旱邑宰禱雨而得因

賦詩

甘膏滴滴是精誠晝夜如絲一尺盈祗恠閭閻喧鼓
吹邑人同報東長生

唐李商隱奉同諸公題河中任中丞新創河亭
萬里誰能訪十洲新亭雲構壓中流河鮫縱翫難爲
室海蜃遙驚恥化樓左右名山窮遠目東西大道鎖
輕舟獨留巧思傳千古長與蒲津作勝游

唐溫庭筠遊蒲津河亭

倚欄愁立獨徘徊欲賦慚非宋玉才滿座山光搖劍
戟繞城波色動樓臺鳥飛天外斜陽盡人過橋心倒

影來添得五湖多少恨柳花飄蕩似寒梅

唐唐彥謙蒲津河亭

宿雨清秋霽景澄廣亭高樹更晨興
烟橫博望乘槎水日上文王避雨陵
孤棹夷猶期獨往曲欄愁絕每長憑
思鄉懷古多傷別此際哀吟幾不勝

唐殷堯藩鸛雀樓

危樓高架沈寥天上相閒登立綵旃樹色到京三百
里河流歸漢幾千年晴峯聳目當周道秋穀垂花滿
舜田雲路何人見高志最看西面赤欄前

唐薛能夏日蒲津寺居

日日閒車馬誰來訪此身一門兼鶴靜四院與僧鄰
雨室牆穿溜風窻筆染塵空餘氣長在天子用平人
唐薛能送李巡官歸永樂舊居

羨君歸去五峰前往往星河實見仙麥壠夏枯成廢
地棗枝秋赤近高天山泉飲犢流多變村酒經蠶味
可憐曾約道門終老住步虛聲裏寄閒眠

唐薛能河中亭子

河擘雙流島在中島中亭上正南空蒲根舊浸臨關

道沙色遙飛傍苑風晴見樹卑知岳大晚聞車亂覺
橋通無窮勝事應須宿霜白蒹葭月在東

唐李山甫蒲關道中作

國東王氣凝蒲關樓臺帖出晴空間紫煙橫奉大舜
廟黃河直打中條山地鎖咽喉千古壯風傳歌吹萬
家閒來來去去身依舊未及潘年鬢已斑

唐司馬札河中鸛雀樓

樓中見千里樓影入通津煙樹遙分陝西河曲向秦
興亡留白日今古共紅塵鸛雀飛何處城隅草自春

唐雍陶永樂殷明府縣池嘉蓮

青蘋白石匝蓮塘
水裏蓮開帶瑞光
露濕紅芳雙朶重
風飄綠蒂一枝長
同心梔子徒誇豔
合穗嘉禾豈解香
不獨豐祥先有應
更宜花縣對潘郎

唐許棠過中條山

徒爲經異岳
不得訪靈蹤
日盡行難盡
千重復萬重
雲垂多作雨
雷動半和鐘
孤竹人藏處
無因認本峰

唐吳融登鸛雀樓

鳥在林梢脚底看
夕陽無際戍烟殘
凍開河水奔渾

急雪洗條山錯落寒始爲一名拋故國近因多難怕
長安祖鞭掉折徒爲爾贏得雲溪負釣竿

唐吳融首陽山

首陽山枕黃河水上有兩人曾餓死不同天下人爲
非兄弟相看自爲是遂令萬古識君心爲臣貴義不
貴身精靈長在白雲裏應笑隨時飽死人

唐張濯歷山舜廟

帝鄉遺廟出河濱萬代千秋仰聖君蒲坂城邊長逝
水蒼梧野外不歸雲寥寥象設魂應在寂寂虞篇德

已聞向晚風吹庭下栢猶疑琴曲韻南薰

唐張良器河曲榮光

引派崐山峻朝宗海路長千齡逢聖主五色瑞榮光
隱映浮中國晶明助太陽坤維連浩漫天漢接微茫
丹闕清氛裏函關紫氣旁位尊常守伯道泰每呈祥
習坎靈逾久居卑德有常龍門如可涉忠信是舟梁

唐張隨河中獻捷

叛將忘恩久王師不戰通凱歌千里內喜氣二儀中
寇盡條山下兵迴漢苑東將軍初執訊明主欲論功

落日煙塵靜寒郊壁壘空蒼生幸無事自此樂堯風

唐司空圖王官谷退棲

宦遊蕭索爲無能移住中條最上層得劍乍如添健
僕亡書久似失良朋燕昭不是空憐馬支遁何妨亦
愛鷹自致此身繩檢外肯教世路日兢兢

唐司空圖丁未歲歸王官谷

家山牢落戰塵西疋馬偷歸路已迷塚上卷旗人簇
立花邊移寨鳥驚啼本來薄俗輕文字却致中原動
鼓鼙時取一壺閒日月長歌深入武陵溪

唐司空圖王官谷二絕句

風荷似醉和花舞沙鳥無情伴客閒總是此中皆有
恨更堪微雨半遮山

荷塘煙罩小齋虛景物皆宜入畫圖盡日無人只高
卧一雙白鳥隔紗厨

唐司空圖歸王官谷次年作

亂後燒殘滿架書峯前猶自戀吾廬忘機漸喜逢人
少覽鏡空憐待鶴疎孤嶼池痕春漲滿小欄花韻午
晴初酣歌自適逃名久不必門多長者車

唐司空圖休休亭

且喜安能保那堪病更憂可憐藜杖者真箇種瓜侯
唐司空圖修史亭五首

山前鄰叟去紛紛獨強衰羸愛杜門漸覺一家看冷
落地爐生火自溫存

甘心七十且酣歌自算平生幸已多不似香山白居易
士晚將心事著禪魔

烏紗巾上是青天檢束酬知四十年誰料平生臂鷹
手挑燈自送佛前錢

少年已慣擲年光時節催驅獨不忙今日無疑亦無
病前程無事擾醫王

籬落輕寒整頓新雪晴步履會諸鄰自從南至歌風
頂始見人煙外有人

唐道士呂巖題靈顯觀

素衣邱壑寄生涯相近衡茅共幾家卧聽松音臨水
石坐看山色老烟霞林中有鶴窺來客巖畔無人見
落花但把琴書消息過不須爐裏煉丹砂

觀舊在中條下

五代張喬鸛雀樓

高樓懷古動悲歌
鸛雀今無野燕過
樹隔五陵秋色
早水連三晉夕陽多
漁人遺火成寒燒
牧笛吹風起
夜波十載重來值
搖落天涯歸計欲如何

五代鄭遨中條觀

松頂留衣上玉霄
永傳異迹在中條
不知揖徧諸仙
否欲請還丹問昨宵

宋真宗汾陰禮成

雲岱尊先志
汾陰狗衆情
爲民祈稔歲
揆日奉嘉牲

述職諸侯至丁辰茂典成靈祇頒福祉信史著聲名
夙夜精心達華夷慶賜行非因承景貺豈獲薦豐盛
昭感慚馨德來同荷上清倍思增惕厲勤政泰羣生

宋楊億送路學士知河中

一麾新自海濱還又佩魚符入故關千里山河臨劇
郡九天鴛鷺別通班樓經往聖迴清蹕路接邊夷獻
白環版籍素多田賦錯干戈初息羽書閒從軍上客
雕龍藻佐酒妖姬墮馬鬟更遣府公吟思發中條新
霽碧孱顏

宋梅堯臣黃河

少本江南客今爲河曲遊歲時憂漾溢日夕見奔流
齧岸侵民壤飄槎閣鴈洲峻門波作箭古郡缺爲牛
目極高飛鳥身輕不繫舟寒冰狐自聽源水使嘗求
密樹隨灣轉長簪刮浪收如何貴沉玉川秩是諸侯
宋歐陽修黃河八韻寄呈聖俞

河水激箭險誰言航葦遊堅冰遲馬渡伏浪卷沙流
樹落新催岸湍驚忽改洲鑿龍時退鯉漲潦不分牛
萬里通槎漢千帆下鷁舟怨歌今罷築故道失難求

灘急風逾響川寒霧不收詎能窮禹跡空欲問張侯

宋石延年咏首陽

遜國同來訪聖謨適觀爭國誓師徒耻生湯武干戈
日寧死唐虞揖讓區大義完身安是餓清魂有所未
應無始終天地空前後名骨雖雙此行孤

宋郭仕道首陽山行

首陽山青龍嵒上聳紫蓋凌瑤空下周林壑盤蒼龍
嵯峨自太古萃律鎮寰中黃河西來繞其下日夕雲
氣開鴻濛恍疑鬼神護又似丹青工諸峰不敢並蒼

翠光玲瓏我生癖性愛山水見此奇絕摩雙瞳忽憶
武王收諸夏夷齊扣馬來山東風雲變化適際會耻
逐龍虎爭奇功歸來守巖穴鬱鬱抱孤忠朝采山上
蕨暮拾山下蓬渴飲澗中水熱眠雲外松既不學赤
松子又不侶商山翁丹誠耿耿照白日勁節凜凜摩
蒼穹首陽青青萬古色不改夷齊之心胸直與天地
相始終千載扶名教二子功無窮我歌首陽歌未歇
泠然八表生清風

宋王禹偁五老峰

矗矗拂星榆崢嶸與衆殊精靈犇昂宿神異載河圖
捧日光先及參天禮不趨綠蘿供組綬清籟獻笙竽
淺雨遙霑華微風下照蒲僧窻分未定郡閣占應俱
莫莫雲交袂霏霏雪映鬚巨靈羞未壯玉女願爲奴
磊落工難盡參差德不孤兒童溪石小几杖澗冰枯
洞鄙三茅隱山嫌四皓逋分形皆自立倒影要誰扶
將數慚同漢臣名合贊虞嵩峰真樹黨天柱大無徒
安得隨人意移將近帝都吾君處南面萬歲一齊呼

宋王禹偁中條山

崛起巨流邊奔騰欲上天遠臨滄海盡高與太行連
大塊橫爲脊他山立似拳土膏經舜耒石險任秦鞭
洞黑狂吹雨峰青冷罩烟店荒壇社絕寺古栢梯懸
崦漏微茫雪巖垂淅瀝泉迸根通砥柱斜徑入間田
北笑恒藏寶西輕華聳蓮三門遙托迹五老迥差肩
落實樵夫拾靈根本草傳柱空擎鴈塔倒影蓋漁船
繪畫終無手封崇必有年鹽池浮翠靄蓮澤媚漪漣
陰壑乖龍蟄枯杉凍虺穿圖經標數郡神異產羣賢
呼壽嵩何謫升中岱豈專斯文如已矣此地可終焉

暫看猶銷病頻登合得仙許昌休自負吾什亦銘鐫

宋江休復司空侍郎故居

首陽采薇士商代緬以遐唐季有夫子遯世肥且嘉
振跡離汙險抗志凌青霞剥運扇頽風奸雄斥回邪
不然隨流波橫噬猘獠牙吁哉土德衰睽乖鬼盈車
英英夫子賢顯晦吾所嗟想見棲隱情遺文搢菁華
山藏白駒谷水逸騷人家躊躇碧峰前寒日忽已斜

宋胡宿蒲津河亭

津亭欲閱戒棠舟五兩風來不少留西北浮雲連魏

關東南初日照秦樓層城渺渺人傷別芳草萋萋客
倦遊平樂舊歡收不得更憑飛夢到瀛洲

宿字武平有名宋仁宗時志稱唐人非是

宋司馬光送堯夫知河中

耆老承風舊絲綸錫命新展禽安屢黜原憲樂常貧
執志窮通一論交表裏真但祈深自重膏澤望斯民
宋司馬光送冲卿通判河中府

聞道名都行有期依然想見昔遊時寒光一曲秋河
轉翠嶺三條夕照移孤竹舊風民有讓重華餘教俗

無疵不須到日方登歷已在君家十二詩

宋司馬光和邵不疑較理蒲州十詩

飲亭

飛蓋名僚集臨流芳宴開縈紆漱文石次第傳清盃
迴波亦多意并泛落花來

涌泉石

蒼然片石寒百道飛泉吐高堂忽蕭颯坐失炎烝苦
鯨龍卧欲飛仰嚙秋空雨

翠樓

條山翠氣橫隱嶙秋空窄危樓雨初度卷幌延佳色
撲撲滿前軒嵐光眞可摘

碧樓

煙瓦疊琉璃危樓半空倚歌鐘奉高宴聲來碧雲裏
日暮天四垂黯淡如秋水

靜齋

逸二句 聊窺碧甃缺寒草生歷歷時聞山鳥呼未得全

幽寂

槐軒

逸二字 軒已幽况復植宮槐簷外陰沉綠南山雨氣來

逍遙不知久驚此黃花開

涼 逸一字

逸二句 清風滿四境豈獨華棖下不若楚臺人披襟獨

蕭灑

芙蕖軒

荷花爛熳紅不見方塘水蕉葉結飛閣冉冉清香裏
露重忽欹側翩然翠禽起

惜花亭

春意復蹉跎園林日愁寂枝邊綠陰重砌下紅英積
茲亭花最繁飄零尤可惜

竹軒

茂密正當軒欹垂欲侵案風枝忽交戛月影爭凌亂
誠嘉君子心匪直林亭玩

宋司馬光栢梯寺

鑿石開溪峻登崖置閣危笑談空谷應步武白雲隨
衆壑如翻浪鄰州若布棊何當遂棲隱身世兩相遺
宋司馬光過北平王祠

唐相靈祠古到今庭前槐栢綠成陰昔時圖像雖通
妙難狀籌謀爲國心

宋程顥遊萬固白石寺

條山蒼蒼河水黃中蒲形勝天下強帝得賢侯殿一
方四年不更慰民望元逢戊午季春月上心憫雨愁
黎蒼使車四出走羣望我亦奉命來侯疆精誠感格
天意順詔書纔下雨已霽病麥還青禾出土野農鼓
舞歌君王故人相見不道舊爲雨歡喜殊未央聖主
寬憂小臣樂自可放蕩舒胸腸白石萬固皆勝地主

人爲我攜壺觴况逢佳日俗所尚車馬未曉填康莊
扶攜十里雜老幼迤邐千騎明戈鎗初聽鳴鐃入霧
靄漸見朱旆輝朝陽遨頭自是謝康樂後乘獨慙元
漫郎侯來知雖有賓客衆喜更爲將豐穰臨溪坐石
徧巖谷幽處往往聞絲簧山光似迎好客動日影定
爲遊人長乘高望遠興不盡戀戀不知岐路忙人生
汨沒苦百態得此樂事真難常我辭佳境已惆悵侯
亦那得久此鄉他時會合重相語辜負泉石何能忘

宋邵雍蒲津道中

物理人情自可明何嘗戚戚向平生卷舒在我有成
算用舍隨時無定名滿目雲山俱足樂一毫榮辱不
須驚侯門見說深如海三十年前掉臂行

宋俞允貽溪懷古十首

唐衰全忠僭竊士之有忠義之心者皆深嫉之而能
灑然脫去不污其身得全其節者表聖一人而已予
令於虞表聖之居適在境內造其祠拜其像想慕其
平生爲之賦王官谷十詠以發揚其潛德奈何士之
知表聖者以休休莫莫而止耳予近得表聖一鳴全

集觀之至於一歌一詠一亭一榭意皆有謂非若世之隱者自棄於山林之中無心於及物也信乎全出處之大節踵夷齊之高風矣復成貽溪懷古十篇以表聖之德固不待夫歌詠而後見於世人之知與不知豈足恤哉然予區區反覆之若是者蓋示其仰慕之切也詠其名而揚其實庶幾有激於貪懦將歸寫於休休亭以遺谷中之民使春秋社會樵童牧子相與歌於祠之下以奉先生之祀雖愚夫愚婦皆知先生之德久而不忘其祀焉

濯纓亭

皎皎居士纓豈有塵可濯愛茲滄浪清偶以斯名托
轉谷羣鴿歸衝岸游魚躍簷頭碧梧枝秋來垂影薄

覽照亭

杖藜高山頭歷覽衆景會泰華屹若屏黃河瀉如帶
幽懷逐冥鴻萬事寄天籟不見玉京春荒煙起蕭艾

三詔堂

猛虎正橫行孤猿發長嘯名高世人聞三桎鶴書詔
偕笏趨朝參天意獨難料咫尺首陽山清光靜相照

瑩心亭

妖氣滿世間瑩心茲得地瀑布巖前飛勢猛鷗鳥避
洗滌無纖塵澄虛全浩氣清風林表來千載有餘意

九籥室

僊術秘丹經昔人藏九籥幽棲白雲根保此一爐藥
吟殘溪雨來夢斷巖花落萬慮正坐忘未能看舞鶴

修史亭

吁哉土德衰羣姦恣蠱賊欲加蕭斧誅修史乃其職
誰知深山中法若春秋直俄驚濟陰變絕筆幽巖側

擬綸亭

大厦不可扶誥命已云絕老臣坐深林有淚化爲血
擬成絲綸言救世心獨切溪流今尚清夜夜澄孤月

掛鶴臺

汙俗正朋亡歸來卧空谷養鶴不成雙相從守幽獨
素羽信非羣孤唳杳無續高臺委荒榛追想人如玉
一鳴窻

天寒松柏青廐閒騏驥老瀟灑竹窻前超然鳴以道
惟有巖上月時來伴幽討茲意不可忘還將拾殘藁

東渠臺

二渠日夜流利厚爭所起先生坐東亭立法書在紙
老農到今守後來誰敢毀斯人不可見空聽竹間水

宋李釜題王官谷

司空唐達士寂寞卧雲岑擾擾任羣態休休信此心
泉聲半山急柳色舊庭深彷彿登臨處遺蹤一訪尋

宋母流題王官谷

不污唐家亂瀟然表聖居泉聲與山色相得共清虛

宋樂沆休休亭

貽溪澄澈玉峯寒居士當年此考槃訪得遺基青華
下構成危棟白雲端人間日月雙輪轉世外襟懷九
鼎安醉魄吟魂如未泯也應謝我數盤桓

宋雷臨王官瀑布

區區奔走漫華巔一別王官十四年綠玉峽中噴白
玉漑田澆竹滿平川

宋黃震遊棲巖寺

山頭古栢隱禪林橋過尋真一徑深知府未成歸隱
計治中聊發望川吟明璣萬斛泉飛瀑碧玉千竿竹

散陰須信冷雲庵裏客曇延人去嗣潮音

金蔡珪司空表聖祠

簿書期會敢遷延暫爾城樓借榻眠咫尺王官未能
去俗緣妨我愛山緣

黃塵烏帽走西州溽暑秋霖兩滯留居士有靈應見
笑微官何事不休休

雲裏高欄面面風欄邊列樹障秋空憑君爲我開穠
綠盡放南山入眼中

金元好問虞鄉麻長官成趣園二首

鑿池水交流築屋山四繞衡門在人境三徑深以悄
中庭八九樹晨坐聽百鳥人生信多慮長寢客未了
虛舟有天游我定物自擾豈不與世竝自是萬物表
達觀無不可言外當境曉

蹉跎匡山游爛漫彭澤酒慨然千載上懷我平生友
夫君負奇節劒氣鬱星斗爲吏非所堪徑去如避走
王官唐以還寂寞蓋已久柴車君來隱清風動林藪
至今溪上詩往往在人口淵明不可作此士寧復有

金元好問虞坂行

虞坂盤盤上青石石上車踪深一尺當時騏驥知奈
何千古英雄淚橫臆龍盤污泥易所嘆麟出非時聖
爲泣元龜竟墮余且網老鳳常饑竹花實天生神物
似有意驗以乖逢知未必若論美好是不祥正使不
逢何足惜孫陽騏驥不並有世萬億中時有一乃知
此物非不逢轅下一鳴人已識我行坂路多閱馬敢
謂羣空如冀北孫陽已矣誰汝知努力鹽車莫稱屈
金張琚移河中

并戰連年廢吾知有此行條山猶在眼渭水若爲情

飽肉豺狼喜傾巢燕雀驚西樓今夜月愁絕是空城

金趙子貞題風陵渡

一水分南北中原氣自全雲山連晉壤煙樹入秦川
落日黃塵起晴沙白鳥眠輓輸今正急忙殺渡頭船

金陳賡登臨晉西原廢寺

前朝廢寺枕山阿尚有摩雲宰堵波故國已非唐日
月老僧猶指晉山河年來筋力登臨倦亂後心情感
慨多石蘚荒碑碎文字他年更得幾摩挲

金劉昂遊王官谷

潛溪時照塵埃客微雨不遮天柱峯斜日落花人去
盡淡煙樓閣數聲鐘

金張瓚棲巖寺

林表照人白塔明竹間蘭芷石泉清惠崇水木西軒
景煙帶平蕪水帶城

元王惲虞鄉道中

中條如畫色蒼蒼雨過晴嵐帶夕光望入王官饒水
竹路經虞坂乍耕桑未容巖桂相招隱自笑微官有
底忙多謝曉風驅暑退笠簷吹作馬頭涼

元王惲舜井

舍鞍夏陽西褰裳躡雲頂盤折下濬溝失身墮幽阱
孤松突危巔望望雙目炯不圖兩芒屨踐迹聖人嶺
重華不復返欽此孝慕炳降觀臨帝泉冠珮爲肅整
泓澄一勺多浩若淵水迴徜徉不忍去盃飲濯滯梗
慨焉念高風滅沒翻倒景野人前致辭此事傳歲永
有鰥昔在微怨爲瞽所屏窮歸此來田號泣痛自省
空山無所得扶來子孤影彼蒼彰聖誠暘餒恐或肯
一事兩崖間二水出俄頃北崖縈帶流南壑湛寒井

至今山中人飲食了二頃我生千載後懷聖心耿耿
風俗日淪喪道誼奚所秉安得天瓢手挹此霜露等
士林摧姦枿比屋化封穎滌易臣子心骯髒變骨鯁
暮歸田舍眠有志安得騁此心恐未能作詩聊自儆
且當就巖蕨酌水煮殷鼎

元王惲遊萬固寺

中條鬱蒼蒼首尾固雄大連山一卧虎矯首盡兩界
東南萬峪門犖确入幽隘空青上絕壁巖窠兩崖對
南北開畫屏高下蔚萬檜扶藜到山門黃衣六七輩

寺殘薄佳賞一水良可愛尋源入雲蘿不惜阮屐敗
掬飲清臆塵坐睨巨石恠飛空響珮環林迴勝怒獬
行聽溪聲回周覽詢勝槩當年爽心亭萬竹爭映帶
碧蘚照清泚襟袂濯沆瀣人境兩渺茫佳句儘誇邁
開軒邀客飲放目欣一快盤餐固疏糲泉冽幾肉噉
少焉林風振萬壑一氣噫前林疑虎嘯作勇助吾憊
筆落還自驚一掃衆峰靉山僧喜醉吟海會得珠貝
興來本無心游藏詫佛界夕陽送歸鞍依約虎谿外
風煙作硯墨塔影失所在鍾英壓摹寫閔伏化機藹

盤空乏硬語技癢若無賴馬首詩遽成一嘯豁吾隘
元王伯廸三詔亭

水竹蕭森一徑開濯纓亭下洗塵埃情知相約皆無
實不礙偷閒乘興來

元王思誠臨晉道中

嶠原回首望汾陰寶鼎精銷瑞氣沉千古帝王行幸
地草荒輦路暮雲深

元王思誠過郇城

世傳今猗頓本屬古今狐四境村墟僻千年壁壘孤

郇瑕宣撫地秦晉戰爭區對澤空城在桑泉故邑蕪
牛羊多茁壯田畝亦豐腴膾膾重華甸茫茫大禹都
峨嵋遙入陝剗首近連蒲南補鹽池埭東穿涑水渠
馬王存舊廟張相表通衢賢聖流風墜貧窮習俗龕
羣黎如欲富何不問陶朱

元王思誠虞城

金鷄堡峻壓崇墉襟帶關山幾萬重虞芮古城連境
界茅戎舊邑入疆封山頭百折顛軫坂水面三門砥
柱峰驥負鹽車逢伯樂賢傭版築遇殷宗但聞虞虢

亡唇事不見巢由洗耳蹤掛鼓石尖寒日淡煉丹爐
口晚煙濃年華冉冉如飛矢人世悠悠似轉蓬天地
無窮生物意山川不改舊時容清沿澗谷涓涓溜翠
拂祠堂鬱鬱松且喜巡行公務簡賦詩聊復慰疎慵
元郭嗣興咏臨晉

臨晉河東邑成周魏解梁緩化更他號桑泉復舊隍
懸州居舜坂併縣得虞鄉地里時沿革山川勢渺茫
黃流雄滾滾凍水遠湯湯峭阜踰聞喜中條接太行
二嶷爭崕嶠五姓注滄浪碧瀋源頭活蒼崖瀑布涼

靈峰齊偃蹇天柱特昂藏形勝開千載輿圖壯一方
城池殊屏蔽解宇式軒昂製錦掀高榭鳴琴敞後堂
街衢紛並出廬舍鬱相望官稅司交易兵巡職警防
惠民恒啓局育士總登庠養濟初分院存留小置倉
神祇嚴廟宇郵驛達康莊宮觀超雲閣浮圖屹寶坊
名村多取姓列肆悉通商戶數編年定田疇出賦常
往來逢軌轍汎覽絕舟航土燥惟憂旱人淳頗尚剛
編氓專稼穡庶士薄文章習藝非工巧趨農雜女郎
用財元儉嗇酗酒輒豪強幼穉婚先聘期頤壽且康

使令稀婢僕歌舞盛優娼築室何須柱爲門但穴牆
編蘆施坐席壘炕作匡床鞋底還成紙毛聯足裹糧
冠巾且蒲笠貯物置荆筐雙衛勞耕耒三犍慣服箱
階除紛狗彘町疇踐牛羊播種宜麻麥蒔秧乏稻粱
販蔬盈市井鬪藥入林榔棗棘叢籬畔樗槐蔭路傍
邊山多植柿近郭罕栽桑苜蓿青供茹蒲萄紫壓漿
鼠肥偏喜食魚美鮮求嘗羅鴈來秋渚呼鶴向曉岡
簷棲馴鵲鴿丸轉智蜚蜚博物知生產觀風重品量
澆漓由積習衰盛繫興亡賜地功誇畢封君將數楊

王官餘迹在扁鵲古塋荒玄素崇資顯司空隱德昌
石存猶指柳碑樹慕追王張使科名著陳侯政譽揚
申生能盡孝麻氏尚流芳表闕旌崔婦名村憶霍光
佛僧形已化仙術道尤彰給飲池亭廢屯軍堡府張
斜途傳漢代故井識殷湯列冢皆英宦遺祠各禱禳
記銘昭事實詩律逞琳琅

元孔克堅王官谷

避暑王官谷翛然興不羣飛泉落秋雨茂樹結寒雲
天影臨流見春聲隔竹聞時同三三友尊酒坐論文

元段成已汾水秋風

一曲劉郎發棹歌
歡聲未已奈悲何
只今回首空陳迹
依舊秋風捲素波

元趙孟頫送田師孟知河中府

漢二千石入爲相
邑令或入爲三公
聖朝用人亦復爾
予以此賀田河中
田侯年少與予友
今三十年俱白首
離觴未盡去馬鳴
愁向風前折楊柳

明薛瑄虞帝廟

巍巍宮殿倚城阿
至德光華永不磨
黃屋當年歸揖

讓蒼生終古尚謳歌
旻天晶晶星辰爛
歷野芄芑黍稷多
千載河山渾似舊
觀風今日喜重過

明薛瑄登中條東頂

魏國中條此盡頭
登臨暇日興悠悠
兩崖勢轉黃流靜
萬壑聲寒碧樹秋
官舍飛甍臨遠谷
琳宮細路繞層邱
風光滿目皆吾土
逸氣飄然總勝遊

明何景明首山王君書屋

王君首山下新起
讀書樓雲霧懸蘿
入湍波湧竹流
具茨黃帝宅
嵩少羽人邱
想待功成去
方爲此地留

明韓文中條玉柱峯偶題

不到仙家十五年可人風景尚依然
半巘花語龍歸洞滿地松雲鶴避烟
近水丹崖常得月凌空畫閣欲參天
賞懷未了登臨興歸騎斜陽懶著鞭

明楊博河中形勝

秦晉相望鷄犬聞黃河一派就中分
西連仙掌明初日北接龍門起暮雲
五老峰前猿自侶二賢祠畔鹿爲羣
琴堂故跡依然在千古高風仰舜薰

明楊博五老歌

曉披五老峯上雲晚釣五姓湖中鯉忽逢漁父三五
人問是五姓誰家子自云無姓亦無名世代相傳常
釣此月落天昏駕小舟從來未見風波起得魚心自
安無魚心亦喜公昔提兵在薊門單于繫頸呼韓死
頗聞飛語轉流傳彫弓幾付東流水東流水真可笑
何如相將日垂釣白雲冉冉生元鶴雙雙叫極地與
窮天居然不盡其中妙

明王崇古王光祿山庄菊宴

買山堪避俗引水地偏靈樹隱龍宮碧苔封石磴青

泉聲竹裏出鳥語花間聽極目長河外三峯列華屏

明王崇古宿隣山書屋

愛爾隣山屋幽懷寄薜蘿白雲擁戶近綠樹入簾多
雨過千峰色風回萬籟歌夜深秋意靜渺渺見銀河

明王崇古吊首陽書院故址

漢代股肱郡山河拱舜城憑高開藝苑列館授諸生
濟濟人文會悠悠弦誦聲人亡澤未熄刼至地爲傾
搖落啼山鬼陸沉失舊京薰風還自至華月爲誰明
翰墨惟秋草宮牆起暮螢感時思振袂吊古欲沾纓

陵谷成今古桑田識變更合當回景運再頌濁河清
明蘇祐后土祠

春雨汾陰道秋風漢帝辭蛟螭上苔蘚龍隼失旌旗
雲薄虛沉水烟寒靜裊絲佳人今不見感慨亦當時
明蘇祐真宗行宮

宋帝行宮汾水邊翠華想像杳風煙天書雲篆今何
在玉檢金泥竟不傳伐石自鐫西祀日渡河翻恨北
征年金人十二多零落雙立猶看輦道前

明王世貞蒲州酒

屑瓊爲麴露爲漿超出人間色味香應從帝女傳遺
法不向河東羨索郎

明張佳胤望方山

選勝徵前牒方山蹟著奇湖搖千壁動雲斂萬峯移
高嶺平如掌洪流注似卮百梯誰獨往五老自相隨
倚杖天何近尋源路轉疑孤懷勞極目爽氣自支頤
石鼓鳴深洞鴛漿灌紫芝郵驂行倦矣林鶴怨淒其
瑤草非難拾桃谿會有時芙蓉秋露好合與地靈期

明張佳胤宿永樂宮二首

稅駕南山麓投棲永樂宮地偏雲下榻殿古夜垂虹
舊里真人後浮生過客中相邀華表鶴來往大行東
老栢知何代殘碑不問年斗牛行畫壁枕簟出飛泉
玉檢神霄秘金宮絳節懸石壇中夜月吾欲採嬋娟

明張佳胤登河中西城樓

不盡樓船泛大川還從霄漢俯春煙河汾偶墮朱欄
下秦晉平分落日前西極野雲封劒閣中原佳氣起
幽燕殘花未可傷遲暮嶽色長開玉井蓮

明張佳胤遊曇延洞

蒲州府志 卷之二十二 三
靈巖昔有洞扶杖出青松苔亂游人屐雲留靜者蹤
蓮燈懸琥珀鷺嶺挿芙蓉飛瀑凌天落朱霞鎮日封
河流歸漢渚嶽掌拂仙容花雨飛春樹山風到石鐘
採芝頻見鹿擊鉢恐驚龍劫土須臾事桃源偶爾逢
暝煙何必問珠月掛千峯

明張四維舜廟

重華遺廟古城隈城上薰風百尺臺谷近二陵留異
竹泉分雙井沁新苔深山木石鹿仍過廣殿簫韶鳳
自來千載垂衣逢舜旦慶雲常是護三臺

明張四維鴛漿泉

中經富名山蜿蜒帶河滙造化剖幽藏邱索標靈致
峙峰竦湖陰高指觜觶次南望揖嶽蓮連岑近相避
絕頂有神泉泱漭含元氣澄泓滿不溢燠潦邈不異
雲漢凝清暉灑露奪甘味厥惟帝臺珍鴛漿自昔誌
頃余釋塵鞅鄉山忒容裔尋此奇勝蹤疑爲鬼神秘
秋波浸空碧曉月弄山翠躋攀日無休吟賞夜不寐
拄杖龍所化恰與真源值膏濡草木蕃氣烝川原媚
恍覩九舞境快我千古意振衣天宇濶鳴絃水脉沸

迴眺飛僊洞巖壑下無地信宿憺忘歸蒼茫結幽契
玉池授丹訣潮音闐未試靈液欣可托永言滌心累
明楊元祥王光祿園亭二首

登高通四徑縱目見明湖夾路虬枝栢當闌鳳尾梧
索郎千日醉欸乃一舟孤自得驅鷄術形蹤半有無
水落蒹葭紫林開橘柚黃晚無書可著時與醉爲鄉
飯出胡麻熟盤傾雀舌香邇來多隱思鷗鷺足相忘
明蕭啟秋風辭亭

漢家亭起向汾陰俯瞰中流百尺深昔日遺基微有

跡多年古栢自成林
菊蘭芳歇秋容淡
簫鼓聲殘日色沉
過客漫勞談往事
斷碑無字草蟲吟

明顧福春日過純陽宮

羸馬奔馳西復東
亂山深處得琳宮
雲埋寶劍人何在
塵鎖丹爐火不紅
瑤草滿階空暮雨
碧桃千樹自春風
泥途實與蓬壺隔
借問他年有路通

明朱知鰲登玉柱峯

玉削孤峯象外懸
千盤危磴費攀緣
天開古洞白雲鎖
地控函關紫氣連
石上橫琴彈楚調
坐間垂手汲

清泉千年不朽仙靈跡丹竈蒼松起暮煙

明張廣首陽夷齊祠

大華歟中斷歸然見首陽吾家近相望驅馬陟其岡
繚垣叢灌木吊古空彷徨依依雙塚間二難同一堂
赤藤罨頽碣翠栢經千霜風雨黯文櫬丹青脫杏梁
荒徑蹕狐兔林薄遊麇麇大義凜如昨客來猶負牆
矯矯采薇歌吾將釋衆芳嗟彼熊羆流如何鸞鳳翔

明張循占遊中條

積雨林巒青靄曉蟬聲忽送涼風早苦竹何年長玉

枝空山漫自尋瑤草瑤草瑤草碧澗深仙人贈我紫
霞琴彈來不作人間曲谿谷皆流太古音太古山川
氣磅礴興來攜杖凌丹壑到處紅塵有是非羣真爲
我開玄籥玉柱孤峯景最奇千章松柏護神祠天風
颭颭吹毛骨一望三山生遠思

明尚登岸風陵渡

村村煙火聚小結此山城水遠雲先住關高霧欲橫
榮枯悲往事得失厭浮名遙共華峯約蒼寒耐久盟
國朝錢謙益中條行

君不見中條山陽城昔日曾閉關白衣徵起作諫議
脫屣就職無慙顏月俸計口送酒媪諫紙疊置空箱
間歌呼痛飲夜達旦醉卧客懷不聽還貞元奸佞不
可當白麻旦夕宣朝堂忠臣延頸待誅僇宰相惴伏
眠如羊中條山人起伏閣延英門上飛風霜諫官叫
天爭喧虺金吾萬歲聲如雷延齡不相陸贄免奮臂
坐使唐天回乃知酩酊不言有深意務欲撥棄細碎
爭崔嵬我過中條山念君如宿昔君名長比條山雲
君心尚似條山石一代相知李鄴侯千年涕淚避賢

驛思君不見可奈何
酹君一觥歌主客
君不見長安
碁局日紛紛
著眼爭如局外人
若無衡嶽爐邊客
誰向中條訪隱淪

國朝蔣超中條柿林紅葉十二首

爛漫華陽翡翠塵
琅霞靈壽踏秋新
分無再覩七真
面紅葉滿山當故人

絳河明滅夜堂紅
天女朱絲奏晚風
珠珞雲衣看不
見翠鈿落在石欄東

剡末丰茸韎韞光
勒叉絨色引微霜
隋宮妃嬪無身

手費盡刀圭作綵妝

幽軒俯瞰雲生城高閣斜連錦滿桁一覺黃庭翻讀
後滿身金紫策真卿

九日射來紅落彈六鰲搯後血殷髻雕雲錯悞金天
輦華蓋編珠后土旗

抱朴精廬寄碧山丹芽紫穠滿巖攀山腰酒色瀾翻
甚歸路紅雲把客闌

空谷佳人笑欲然朱唇酒暈索題箋香衫細馬遊仙
夢多在紅羅玉珮邊

彤管親題綉帶舒秋風鴈塔忽逢渠只因解惜紅羅
幘落葉堆成不忍書

妙麗曾經勸酒頻溫柔爭贈紫羅巾珊瑚樹下輕聲
過怕有紅樓欲墜人

仙人賭失班龍哭怒擲于闐暖紅玉借騎帝女赤鸞
還紅光一道騰星燭

菊秀蘭衰樹擁霞翠翹紅袖石闌遮豪家金谷輸吾
懶坐看秋林當麗華

華林清夢應難撥綺語霜髭斷不支待得春風圖畫

永冰霜憔悴已多時

國朝王含光五老峰

虞鄉西南五老峰一峰一朵玉芙蓉層城亂插櫻桃
樹絕頂斜簪羅漢松中峰孤秀凌空起矗矗去天一
握耳四峰却立不敢前儼然商皓翊帝子羅列石筍
似兒孫或載雲旗驂騶駟我欲步虛叩僊寰絕巘蘿
颺不可攀但見流風吹素氣懸泉飛薄戛珮環玉竇
穹嵌鐘乳滴香雨溟濛非人間西過林坳登欹石道
人指點羅公迹柯爛丹成去不廻至今樵者聞流奕

月照前峰雲影飛相傳半是蓬萊客一壺山酒謝山
靈空翠撲人衣帶青野鶴歸來憐華表仙翁何處化
流星恍惚不知歸路在谿烟花樹雨冥冥

國朝王含光猗氏城南樓獨眺

蕪城層閣獨登臨遶檻煙嵐雨後深水曲蘆花留晚
雁山坳木葉下清砧殘霞忽墮杯中色遠岫偏舒物
外心徙倚斜陽人不見誰爲解釋仲宣吟

國朝王含光王官谷似園幽興四首

南園春雨晴細草遶砌生灌木漸抽蘂雲鳩忽已鳴

陂池生新水水鳥何無聲掃榻山色下關簾道心生
客來欣倒屣暢此邱壑情蘭室促玉軫竹房敲楸枰
園蔌青堪摘家釀綠長盈願勿談簪笏致渝鷗鷺盟

其二

結廬蕪城隅一壑紆如帶地濶絕四鄰短牆隨松檜
時事杳無聞愁悴日以汰宛遊邨墅間不復識冠蓋
晴瞰積翠陰夕秀抒靈靄陟阜愜遠懷泛船挹清瀨
故人隔重山片鴻唳天外空林獨往來樹葉散秋籟

其三

暮年多遯思買田王官谷卜宅當谷口聊構數椽屋
門對天柱峰牕掛千尺瀑仙靈委空蛻逋客遂初服
高嶺披松杉深巖藏橘榭峽偪疊溜鳴崖斷危石撲
細路連棧橋層巔走牧犢場鹿隨客行野鳥衝人逐
烏桺晚葉紅霜栗秋漿熟求友逢漁樵見月坐林麓
樂事復同人誰云媚幽獨

其四

山遊無遠近來往不可期著屐出村園杖竹相扶攜
循磴踏亂石攀巖挽纖枝振衣層岡上衆山逞其姿

煙林鬱綿綿宮觀何參差危窗嵌絕壁飛泉灑流澌
滴瀝結空翠寒陰絡細蕤登臺岫雲迎長嘯谷風追
有酒疲可滌無絃情乃移夕陽變峯影歸路應棲遲
嘆息千百載後來者爲誰

國朝王士禎送吳雯歸中條

月始在房羣陰終凍禽塌翅啼酸風呂生置酒邀我
飲清歌笑倚商玲瓏朝來宿醒卧未析吳郎告我歸
河東北風雨雪滿天地層冰千里高穹窿行人韞瘕
手指墮狐裘嗟汝胡蒙葺長安甲第高入大馬蹄動

地聲隆隆漿酒霍肉不足道金玉磊砢堆堂中汝詩
千首文百軸洿塗未拔誰相通汝家王官谷中條青
濛濛藤蘿相糾水相激至今猿鳥悲司空汝歸讀書
甘菽茂致君堯舜曾有日飛伏詎辨誰雌雄

國朝王士禎猗氏往蒲州道中有感

令狐城畔雨霏霏遙指中條積翠稀西接新秦三輔
迴東鄰故絳兩川圍空聞魏國山河美久識唐家節
度非愁絕無心更懷古清秋風景亦霑衣

國朝王士禎中條山下作

中條初日上嵐彩變朝昏芳樹重重塢流泉曲曲村
河流趨底柱山勢鎖關門借問王官谷貽溪跡尚存
國朝宋之樹咏猗氏風景

桑泉風景近何如半是耕田半讀書嶺號峨嵋多種
麥溪名涑水不生魚郇侯祠畔春雲滿猗頓宅邊古
木疎地屬唐虞民尚朴城中宛似野人居

國朝介孝璿王官秋望

祠外高樓日影斜秋橫飛盡見天涯王官亦是論兵
地父老誰傳賣酒家萬嶂烟霜全晉樹千年風雨晚

唐花黃河只在諸峯下烽火難尋海上槎

國朝劉允升后土祠

漢宮唐殿宋碑銘
雕上靈光接上清
高阜長騰金寶氣
繡帷輕護珮環聲
苔痕剝落秋風冷
棟粉零星夜月明
獨有多情汾水潤
白雲黃葉雁行橫

國朝郭于疆猗氏荆烈婦詩

就木何慷慨而無愧
日星長從封馬鬣
相傍駕雲輶
泉血凝芳碧
霜肝照汗青
啼鵲悲毅魄
山鬼護幽靈
一夕冰魂逝
千年玉骨馨
潺湲涑水曲
恨泪潑荒坵

國朝吳雯虞鄉口號二首

楓林颯颯石磷磷
壠上饑鳥飛趁人
烹羊釀秫勞田父
打鼓攤錢賽社神

舍南舍北蔓寒瓜
東門有池方漚麻
老農何處牽黃犢
行過一灣紅蓼花

國朝吳雯王官谷

朱樓覆殘雪花葉
無冬春衆水急爭
壑一峯閒對人
白雲識心素空谷
留皇醇晚來鷗鷺
侶接翅桃源濱

國朝朱彝尊題吳雯徵君詩卷

藉甚吳郎大雅材賦詩不上栢梁臺翻飛却似橫汾
雁幾度秋風上苑來

三晉風騷雜僞真遺山沒後更無人把君行卷誰堪
並除是番禺屈大均

國朝郭九曾遊仁壽寺二首

竹林深處吟詩苦便是逢僧未覺閒借榻聊從消午
夢攜樽不碍叩禪關風度爐烟浮下院鳥啣栢子落
前山三年重到招提境明鏡臺邊照舊顏

峨眉長護梵宮幽縹緲諸天閣上頭隴麥連阡看作

浪山城背嶺繫如舟浮生半向名場老薄暑全消野
寺秋作述幸逢陶謝手相期攜屐日同遊

國朝喬光烈二賢祠

孤竹遺祠在千年尚首陽殷周何處問薇蕨至今香
苔覆殘碑綠河流落日黃登臨吊餘跡不盡意蒼涼

國朝喬光烈五姓湖

湖光千頃渺烟波圖畫相看竟若何遠岫堤長春樹
暗晴天沙暖浴鳬多詩情處處臨風好漁笛聲聲向
晚過一曲滄浪清興足不知誰和扣舷歌

國朝喬光烈萬固寺

官曹無時得暫閒那許問寺還尋山偶然休沐值此

日且卜勝地成躋攀中條之麓最清杳白石萬固藏

其間

明道先生萬固寺紀遊詩萬固白石皆勝地

凌朝出郭未十里溪環

澗珮鳴潺潺穿林入谷踏确磈一徑下馬敲禪關上

方幽景隔塵事老僧白髮皆蒼顏齋磬無聲竹樹靜

但有鳴鳥相綿蠻石泉甘冽試一酌煩襟已似濯且

刪吳生妙跡留舊刻諸天瓔珞看珊珊

寺有吳道子畫石刻浮

屠突兀起天半舍利內貯光爛斑唐年到今已千載

擁勢尚覺不可扳更登高閣時恣眺黃河西來如帶

環秋毫百里盡到眼太華黛色眉痕彎頗思流連窮

日夕坐待嶺月生溪灣催歸後騎帶夕照松風吹斷
仍人寰香林回首更騁望重來有約能無慳

國朝喬光烈中條晴色

雨洗中條出千峰向晚晴遙迎郭門翠高入郡樓明
鬢鬢娟娟影烟暉處處情清吟對從事敢擬謝宣城

宣城集有與從事吳均聯句詩

國朝喬光烈純陽宮呂仙故宅

碧落蒼梧自遠遊尚餘故宅枕山幽袖中劍氣蛇三尺
世外笙吹鶴十洲跌蕩酒杯酣綠蟻流傳詩句寫

紅榴金丹何處從君乞空訪珠宮古樹秋

國朝喬光烈同周使君遊棲巖寺

古寺空山不記年斷崖懸峭落飛泉藥苗香徧深春

後樹色陰成永晝邊洞失曇延人不見殿荒仁壽字

猶傳爰知刺史多才藻定有前賢屬和篇

唐大歷才子李益盧

綸皆有棲巖之作

國朝喬光烈汾陰懷古

雕上精靈在猶傳漢武雄樓船秋色外簫鼓夕陽中

汾水今亦徙祠宮久已空徒然歌寶鼎歲歲自西風

國朝喬光烈河中懷古

無復題詩鵲鵲樓空將舊事說秦州

蒲州古爲秦州

山河不

改千年色戰伐頻看異代愁禱罷祥符沈璧馬鑄殘
天寶剩金牛于今禹甸歸清宴父老中蒲樂未休

國朝周景柱望首陽吊夷齊墓

聖人師百世清風留萬古首陽名與太華高端然託
此一抔土扣馬之事後世疑論定千秋有孔父殷周
瞥過如逝鳥陵栢鬱鬱茂林莽大河浩浩去不息流
盡歲月不計數二子之名終未歇直與乾坤久相處

當年困餓甘如飴食薇何曾心覺苦

國朝周景柱五姓湖歌

君不見昔日張揚池更名五姓知何時湖波滌淼不
知遠澄作汪汪千頃陂平開鏡面天上下靴紋屈織
鋪琉璃長虹偃卧亘南北小橋如畫相參差春來錦

樹暗圍合湖岼四望烟霞披當年樓閣惜無有

湖濱
往時

多人家
樓閣

不見酒舍搖風旗晴光倒景生漣漪潌泅沙

渚相迷離漁舟幾點乍出沒櫂歌一片遙東西有時
鷗鷺爭上下浮波刷影狎且怡菰蒲深處堪把釣藕

花香裏宜啣卮惜哉篷窗不得拓綠蓑青筠無由隨
我家家山繞青溪屐齒長踏西湖湄佳時每憶弄潮
節勝處最愛蘇公堤荷花桂子香十里一葉泛艇涼
吹衣錢塘門外不歸去湖光戀客斜陽低一行作吏
向天末符竹坐綰身相羈塞門秋獵看射虎郡閣睡
破驚鳴雞水仙祠下夢難到六橋辜負遊驄嘶今朝對
此風景好江鄉回首情依依空濛灩澦晴雨裏買船
載酒何時歸

國朝周景柱奉和憲使喬公遊棲巖寺

禪棲無處問隋年獨有當時洗鉢泉人到翠微金界
外騎停紅旆石幢邊謝公邱壑情何限白傅湖山句
已傳敢把清吟繼盧李

盧綸李益唐時
遊棲巖各有詩

陽春聊屬和

時篇

國朝周景柱郡齋喜雨

旱色畏驕陽遙愁黍葉黃快看雲陣合清聽雨聲長
已覺秋田好憑添北牖涼宵分剪官燭併潤墨池香

國朝周景柱河中書院舊址

驅車出東城得得岡勢起岡頭立殘碣隱隱見文字

讀之未及終歎息浩不已昔時感經營講舍初構此
臯比延雅儒列屋養弟子郡中文學興彬彬實茲始
球琳看接席冠蓋久名里百年事遂過六藝竟誰以
垣宇無復存茂草同踰圯絃歌散風雨芬芳息蘭芷
教學古所先琢璞用成美文翁與高朕化俗照青史
禮卣觀石室至今慕賢軌况當文明世膠序無不啟
安有弛其規可以奏治理我思繼前徽築宮就其趾
考業招生徒經術究端委事之刮與磨英莛出榛穢
文物還舊觀賓王慶多士端唯太守職夙夜謀所底

鞅掌嗟徒勞
媿彼城闕子
誅茅竟何時
棟牖出新綺
一朝公沙門
更合華陰市
詩書化鄉閭
嘉實薦桃李
雖乏治郡良
庶慰願所喜

國朝周景柱王官谷懷司空侍郎

王官高隱處
千載懷司空
舊跡迷春草
孤標羨冥鴻
浮雲雙過鳥
飛瀑兩垂虹
亭上纓堪濯

司空所居
有濯纓亭

流獨溯風

國朝周景柱郡齋讀北史懷古

東龍西虎紛鬪攻
六渾黑獺皆人雄
邛山沙苑真勁

敵宇文一戰初成功蒲州畧定門戶奪鮮卑自此驚
西風長城萬里堪自壞誰謠明月來關中周師忽報
晉陽入直掃鄴下收齊東併吞氣勢倒山岳事去變
滅隨飛鴻鈴聲不動郡閣靜暇散雕帙披緗紅霸畧
割據競彼此何異得失爭雞蟲輾然發我一笑粲仰
見山色啣青銅

國朝周景柱行春郊外

抱城流水一行斜路指烟郊度玉沙麥隴經時青覆
雉柳條隨處碧藏鴉潤知臯壤新過雨香拂行軒淺

傍花還喜太平真有象農歌春酒野人家

國朝周景柱柿林紅葉

蒲人多植柿秋來紅葉鮮妍可愛前輩蔣虎臣太史賦詩多至數十篇刻在郡史暇日見之亦賦四

絕

故教青女夜相催萬樹千林錦作堆見說絳河無路到分明身入茜霞來

盡把珊瑚映夕曛瑤仙齊著石榴裙無邊紅樹多情思遮斷青山鎖白雲

渲抹春工絳欲流扶桑樹下豈知秋金天特地添晴
景艷火鷄鷄燒九州

滿空丹鳳尾襜褕相送炎官卓羽旗赤氣冲融無間
斷今朝心賞退之詩

國朝周景柱望川亭

峰迴高著望川亭勝日登臨倍有情竹箭桃花看共
下岳蓮仙掌對分明天香近帶清鐘度沙氣遙籠野
樹生占斷風光頻縱目歸來燈火動春城

國朝周景柱詠竹筍

蒲中產竹既小于江南其萌倍細供饌正似荻芽
耳苗亦甚晚鄉園首夏即多成竹矣因有末句

已過殘春候初逢笋入筐幾莖青玉削一束紫茸香
筠管纖相似蘆錐嫩共嘗鄉山遙憶處烟雨萬竿長

國朝吉懷永樂純陽宮

仙人遺宅碧山隈劒影蕭蕭去不回滄海月明天萬
里有情鄉國暫歸來

國朝吉懷李義山故居

千年宋玉岷江宅文藻空存跡已荒剩有風流未銷

歇春深芳草共斜陽

才高位下竟何疑獨有騷吟繼楚辭百寶流蘇空自
賞微情祇許郢人知

國朝吉懷風陵渡

黃河東去浪花騰懷古登高意不勝晚渡寒烟秋色
裏行人指點說風陵

國朝吉懷永樂懷古

山河魏國看仍在城郭唐年廢不留白鳥朝來閒自
下還吟秀句憶嘉州

國朝張淑渠奉陪郡守嚴陵周公泛舟五姓湖

八韻

五姓知名地朱幡十月過地偏人跡少山靜葉聲多
碧浪搖丹樹清流映綠螺魚窺名士舫鷗聽野人歌
風定茶烟細日高榜語和詩籤分部署杯酒勸漁蓑
蘇堰功何鉅習池事不磨從公留信宿清夢入岩蘿
國朝畢宿燾奉陪郡守周公泛舟五姓湖三律
喬卿高掛福星駢六邑人家戴二天黃閣已題名姓
蚤簷帷暫寄水雲邊漁歌聲滿花千樹心迹清如月

萬川此日五湖留勝蹟名園佳客盡僊僊

時胡牛兩先生同遊

款乃幾聲小艇遲綠陰深處好風吹一篙新水鷗初起千頃澄波柳自垂亭號醉翁宜載酒軒題名士愛臨池濟川今喜逢舟楫童叟懽呼雨露滋

中條山色映陂塘一片玻瓈菡萏香不日栽成蘇氏柳千年留得名公棠人思去後爭傳謝治寂當時豈讓黃幸托龍門殊自喜行看異蹟達明光

蒲州府志

卷之二十二

三

藝文撰著

益智兵書一百卷

武庫益智錄六卷

九愚山房集

徽州府志

明巡撫副都御史猗氏何東序著山西通志引
其目作息盜兵書與明史及猗氏志所載不同
豈固未之見而徒以其所聞者紀之抑東序或
別有是書史與志俱佚之乎

獻納稿十卷

奏議七十卷

虞坡文集

虞坡詩集

虞坡雜集

明尚書蒲州楊博著明史載詩文十二卷

山堂彙稿十七卷
歸歟漫興稿五卷

奏議五卷

明總督尚書蒲州王崇古著明史目無歸歟漫興稿

衛子剛詩集

明布衣洪武初人有司薦其才辭疾不赴隱居終身八十餘卒

修治條目

襁褓法言

曹月川年譜

太極圖說

酒誥

刑誥

明御史蒲州謝琚著

蒲州志

明四川布政司參議蒲州楊瑩著

西遊集

蟻穴集

呂涇野倡和集

明蒲州謝麟著自號山泉子成化間以人材薦

授鄴城丞棄官歸隱於州東之青渠

四書尚書井觀錄

明陝西按察使蒲州張邦教著

自省編

明中書舍人蒲州王珂著

性理纂要

五經巾箱

大學衍義日抄

明知州猗氏令狐總著

孫侍御詩集

明蒲州孫承恩著錢謙益列朝詩集採之

四書目錄

性理三書一覽

律呂問

明布衣猗氏郭希湯著

去浮集

四禮約

四書臆見

讀書日記

聞見隨錄

明鄖陽府同知蒲州張輝著輝有孝弟之行在

萬歷中

碧山園草

叢篠園集

明尚書蒲州孟時芳著

條麓堂集二十卷 續集十卷

明大學士蒲州張四維著

道學傳

明知縣猗氏陳國柱著

館閣草

明大學士蒲州韓爌著

春秋要旨

明貢士猗氏荆芸著

詩經便韻

萬竹園集

明布衣猗氏王鳳著自號竹窻道人

楊尚書奏議

明戶部尚書蒲州楊俊民著俊民襄毅子也

便民實政

難焚草

咫園集

半九亭集

明御史猗氏喬應甲著

陽紓山房集

明臬使蒲州張泰徵著

籌海代言

明知州猗氏張璞著璞天啟間拔貢以文見知
西極文翔鳳其詩亦常爲孟津王鐸所稱

西津集

明州學生蒲州張廷輔著

鳴巢集

明處士蒲州王旭著

大易圖

明知縣蒲州劉溱著

函園文集

撫登疏草

撫吳疏草

明侍郎榮河李暉著

舜原先生集

明僉事蒲州楊瞻著

忠孝語錄

思齋稿

明廣文蒲州張臣著

介石棲稿

姚墟纂異

紀事六卷

雜記四卷

明左都督蒲州楊俊卿著

重美堂稿

明推官蒲州楊俊士著

館閣試稿

歷官奏疏

喬蔭山房集

明詹事蒲州楊世芳著

宦學初稿

諫垣奏議

諫垣紀事

立朝紀事

明通政蒲州韓楫著

理言十一

山居雜記

明處士蒲州張九霞著

谷口集

易學三述

易圖直解

國朝河南按察使猗氏王含光著

四書淺說補刪

鄰園詩稿

國朝知縣臨晉李世惠著

四書周易便蒙抄翼十六卷

續四書人物彙考 周易圖說

性理增刪

國朝舉人猗氏王巖楨著

四書訓註

詩韻辨音

國朝漳浦知縣猗氏令狐注著

小學家訓

四書心悟

五經闡微

國朝浙江巡海道猗氏衛紹芳著

性理體會

通鑑綱目刪

公餘草

姑蘇吟

淡園集

國朝知府猗氏郭四維著

四書理解

易經詳義

國朝廣文猗氏杜先乙著

本草類通歌括

傷寒全畧解

國朝諸生猗氏潘毓俊著

慕適軒集

臨晉志

國朝推官臨晉王恭先著

著存草

國朝知縣猗氏郭九會著

用存堂稿

國朝翰林編修臨晉謝陳常著

蓮洋集

國朝徵士蒲州吳雯著

中庸衍

河洛經世

地理中庸

栢嵯稿

國朝諸生榮河郭嶷然著

鳩谷詩草

薜荔山房集

國朝知府永濟張鎬著鎬成進士供奉武英殿
出知湖廣應山縣特任廣州知府卒於官少敏
於學蓋植行敦樸者云

崇朴堂偶吟

類書纂要

國朝知縣永濟崔偉觀著

成均課講周易十二卷大學中庸各一卷

讀孟子劄記

讀周子劄記

詩書講義

溫知錄

撫秦政畧

撫楚政畧

太極圖說

國朝侍郎巡撫永濟崔紀著

此心堂詩稿

睡餘草

九陌吟

蜀遊草

國朝知縣永濟姚思恭著

論曰河中之文學盛於唐衍於宋衰於金元而復振於明方明盛時自朝廷至於四海爭以文雅相高著作相尚故縉紳先生必有文集而殫

心撰述自爲一書亦往往輩出蓋其風使然也
在隆慶萬歷之世河中王楊兩尚書尤以功業
著予常得其奏牘觀之其所以治邊事條政機
皆詳且要可施於事而裨於國而同時何中丞
東序亦稱名臣其所論著亦可傳乎世自是以
外或談道德性命之旨或揚文辭詩歌之華傑
然爭起先後尤衆是其爲書或得或失固非可
一言盡要其役志於藝林而勤勤纂述有足多
哉惜其書率未顯而且莫之知也因舉其名類

以列於藝文之後而錄在郡史使無就湮佚焉



